

# *ANG PAG-ILA SA IMONG ADLAW UG ANG MENSAHE NIINI*



Maayong buntag, mga higala. Magpabilin ta pagtindog sa makadiyut lamang.

Minahal nga Dios, samtang kami, ania niining gimok ug kisaw sa kinabuhi, nga mamalandong niining mosunod nga pipila ka mga gutlo o takna, bisa'g unsa man kini, nga Imong gitagana kanamo, aron maghatag pagdayeg ug paghimaya diha Kanimo, aron pagwali sa Imong Pulong, aron sa pag-ila Kanimo pag-ayo, maoy hinungdan sa among panagkatigum niining buntaga. Kami nagapasalamat Kanimo, Dios, tungud kay aniay mga katawhan nga andam ug nangandam sa ilang kaugalingon sa pag-anhi sa pagpatalinghug. Sa walay panumbaling sa mga kahintang ug sa panahon, nga niini ania kami, sila sa gihapon nagatoo. Ug kami nagapasalamat Kanimo tungud kanila.

<sup>2</sup> Dios, kami mapasalamaton diha Kanimo tungud sa Imong dakung gahum sa pagpang-ayo, ang mga saad sa Imong Pulong. Kung unsa ang among mga kasingkasing nagdilaab sa among pagpakadungog niining mga pagpanghimatuod! Ang tanang matang sa mga kasakit nga gipadala diha sa mga anak sa tawo! Ikaw, ug ang Imong gracia ug gahum, ug dinuyogan sa Imong saad, maoy nag-ayo kanila. Ug ania sila dinhi, nagapanghimatuod, nagahatag pagdalayeg sa Dios. Kami nagapasalamat Kanimo tungud niini.

Ug karon hinaut nga kami, niining adlaw, makadungog sa Mensahe nga Imong gitagana kanamo alang niining taknaa. Samtang among basahon diha sa Imong Pulong, hinaut nga Imong ihatag kanamo ang unod nianang among gibasa. Tugoti nga ang Imong pagbuot matuman diha sa tanang mga butang, kay amo kining gipangayo sa Ngalan ni Jesus'. Amen.

Makahimo na sa pagpanglingkod.

<sup>3</sup> Usa kini ka prebilihio nga mahianhi niining buntaga. Ako malipayon kaayo tungud kaninyong tanan. Ug si Igsoong Woods, si Igsoong Roy Roberson, daghan pang ubang mga kaigsoonan, namuhat nga matinud-anon kaayo niining milabay'ng duha ka adlaw, aron ma-aircon kining gambalay alang niining maong katuyoan, 'kay sa miaging Domingo ilang nakita kon unsa ang inyong pag-antus. Ug sila adunay gamay'ng salapi sa panudlanan sa simbahan, ug ilaha kining gitrabaho ug gihimo kini aron makapahimo kaninyong hayahay, pinaagi sa salapi nga inyong gibutang ngadto sa halaran, aron samtang kamo makapanglingkod, makapatalinghug sa Mensahe. Mas

mabugnaw na karon kay sa kanhi. Busa kita mapasalamaton sa Dios, ug kaninyong mga katawhan, tungud niining maong kahigayonan.

<sup>4</sup> Malipayon. . . Si Igsoong Roy Borders, daw gusto lang siya magpabilin sa luyo diha sa likud niining buntaga. Ug ako siyang giingnan nga iyang kuhaon ang iyang lingkuranan ug molingkod dinhi kauban ang mga ministro, apan siya mibalibad niini. Maingon sa inyong nahibaloan nang tanan, si Igsoong Borders maoy nagabarug alang kanato diha sa misyon. Malipayon gayud ako nga ania si Igsoong Borders, ug daghan pang ubang mga ministro ug mga higala.

<sup>5</sup> Sa tibuuk semana ako-ako namalandong, ug miingon, “Kung ako moabot na didto, sa Dominggo, akong himamaton ang matag ministro, ang matag tawo.” Unya sa dihang ania na ka dinhi, puno na ang imong isip sa Mensahe hangtud nga hikalimtan mo na ang tanang butang, halos, mao gayud kana ang mahitabo.

<sup>6</sup> Karon kinahanglan nga mobalik ako ngadto sa Arizona. Kinahanglan mobalik ako sa sunod nga Lunes, usa ka semana, balik sa Tucson, aron kuhaon ang mga kabataan didto alang sa pag-eskwela. Ug ako mobalik dayon human niana. Ug ang asawa ko kinahanglan mosayo didto, aron sugdan ang. . . aron ipalista ang mga kabataan, duha ka semana sa dili pa magsugod ang klase. Ug ako, dayon, ako mobalik sa makadiyut dinhi.

<sup>7</sup> Ug karon kini mao ang panahon sa akong bakasyon. Sumala sa inyong hingsayran, ako nagwali sukad niadtong Disyembre; Enero, Pebrero, Marso, Abril, Mayo, Hunyo, ug Hulyo. Karon, kung itugot sa Dios, ug nga walay mahinungdanong tawag, kini mao ang panahon nga ako-ako-ako mopahulay, ang akong bakasyon. Ako mangayam. Ug akong. . .

<sup>8</sup> Karon kung ang Ginoo pagatawagong ako sa lain pang butang, kining mga butanga dili mahinungdanon. Ang Dios sa kanunay ang mauna. Ug akong gusto nga Siya ang mauna, ug inyong gusto Siya nga maoy mauna. Apan unya kung walay usa ka mahinungdanong tawag, ug kana maoy Iyang kabubuton, kana mao kung unsay akong pagabuhaton karon alang sa sunod nga duha ka bulan, mao ang pagpangayam karon, aron sa pagpahulay sa akong kaugalingon. Akong. . .

<sup>9</sup> Dili ninyo masabot, ang kalibutan dili gayud mahibalo, kung unsay akong sagubangon niini. Kita n’yo? Ug usa gayud kini ka kahago. Agud diay ang Ginoo giingnan ang Iyang mga tinun-an, samtang Siya nakig-uban kanila, “Moadto kamo nga kamo-kamo ra ngadto sa awaaw, ug pamahulay kamo’g makadiyut.” Kita n’yo? Akong nasabot kana pag-ayo, sa matag adlaw, ug ilabina nga ang akong mga adlaw nagakakunhod na dinhi sa yuta, sa inyong nakita. Samtang ako nagkatigulang na, imong masabtan kini. Inyong nadungog ang atong pastor nga nagaingon og “amen” sa niana, usab. Siya, kami, maila

nga dili na kami mga batang lalaki human kami milapas na sa kalim-an ka tuig ang panuigon. Karon kami kinahanglan adunay gamay'ng panahon.

<sup>10</sup> Kita mapasalamaton kaayo tungud sa mga testimonyo nga atong nadungog bag-o pa lang. Didto ang akong asawa kang Mrs. Wood, kagahapon, sa dihang pipila ka mga tawo nga gikan sa Alabama miabot, gikan sa maong dapit, ug misugilon sa dagkung mga butang bahin sa gibuhat sa Ginoo sa nianang tigum, mahitungod sa mga kabataan nga nangaayo, ug sa nagkalainlain pang mga butang. Ug daghan pa kaayong mga butang nga, ay na, nagkinahanglan kini og hataas nga panahon aron-aron sa pagsugilon niini.

<sup>11</sup> Unya usab akong kinahanglang hinumduman nga . . .Ako nagtoo nga ang pipila kanila nagsugilon kanako nga si Igsoong babaeng Larson ania dinhi sulod na sa duha ka Dominggo kauban sa gamay'ng bata. Wala ako mahibalo, apan ako nagtoo nga sila miingon nga ang iyang apo kadto, tingali, alang sa paghalad, ginakuyog kini gikan pa sa Chicago. Ang maong babaye maayo kaayo kanamo, ug kami mapasalamaton kaniya. Ug iyang gikuyog ang gamay'ng bata gikan pa sa Chicago, aron sa paghalad. Maingon nga, adunay iyang gamay'ng panahon aron himoon kini, sa akong pagtoo, alang sa paghalad, apan siya may tinguha sa niining bata nga ikahalad ngadto sa Ginoo. Busa kung ni Igsoong Larson, samtang nagasulti ako, kung mahimo nga iyang dalhon ang bata ngari alang sa niining buluhaton sa paghalad.

<sup>12</sup> Ug unya, tingali, samtang nangandam pa siya, akong-akong buut ipasidaan nga kini maoy labing malisud nga Mensahe nga akong gipaninguha sa pag-andam, hangtud kagabii. Sa tibuuk semana, mosulod ako ngadto sa lawak, sa pagpaninguha aron makapahimulag human sa mga akong mga tawag ug uban pa, aron-aron tinguhaon nga makahuna-huna ako ug butang alang sa maong panahon. Ug sa dihang ako moadto na, ako-akong dili na gani . . .Blangko ang akong hunahuna. Ug, kagahapon, miadto ako sa silong. Ang dahum ko mainit kaayo kadto, mao nga nanaug ako ngadto sa silong, milingkod didto. Ug akong gisulayan sa pagkuha ang akong Biblia ug gibasa, ug ako nahikatulog. Unya ako mimata ug miinum sa tubig, ug nagsulay sa pag-uyog sa akong kaugalingon, ug miadto sa gawas ug nagsuroy-suroy, milingkod sa hagdanan.

<sup>13</sup> Dihay milabay ug hing-abtan ako nga walay sinina, nga nagalingkod diha sa hagdanan; mainit kadto kaayo. Sila miwarawara. Wala ako mahibalo kung miwarawara ba gayud sila . . .Usa ka tawo, tingali'g usa kadto ka tawo dinhi niining maong ciudad, o kaha tawo nga sa simbahan, miwarawara kanako. Ug ako-ako namalandong pag-ayo, igo lang ako-ako mipasiplat sa sakyanan, milabay. Ako miwarawara.

14 Kagabii ako misakay sa sakyanan ug miadto padulong sa Charleston, aron pagkuha'g usa ka butang. Ang Ginoo, maingon nga daw, adunay buut nga isulti kanako, apan akong. . . Si Satanas misulay pagbabag sa akong dalan, aron pagbabag kanako sa pagbuhat niini. Busa namalandong ako, “Bueno, kung iyang ginabuhat kana, ako sa gihapon magpadayon sa pagpaabot, magpabilin lamang sa pagpaabot, magatuktok sa pultahan hangtud nga Iyang buksan.” Busa dayon sa paghilabay sa pipila ka mga gutlo, o igo lamang makalabay ang ikapito ang takna kaganinang buntag, ako mibangon ug sayo kaayo.

15 Kagahapon, medyo adunay gamay'ng gibati, naninguha sa. . . Ako nakakaon sa mais nga dili ako kaayo moangay, nga hilabihan kainit, ug ako-ako nagasulay paglikay gikan niana. Ug-ug dayon kaganinang buntag, sa mga ika-walo ang takna, nahitabo nga akong nabuksan ang Kasulatan nga maoy nakapatingala kanako. Ug akong gitan-aw pag-usab kadtong maong Kasulatan, ug usab Kini nakapatingala kanako. Ug ako mipadayon, gisubay Kini pinaagi sa Kasulatan, ug nahuman ko lang kini sa milabay nga mga gutlo. Busa niini tingali'g anaay Mensahe ang Ginoo alang kanato, niining buntaga, nga gipaninguha ni Satanas sa paglilong kanato.

Mahimo bang imong dalhon ngari ang gamay'ng bata, Igsoong Larson? [Si Igsoong Branham nagahalad sa bata, Walay sulod sa teyp—Ed.] Ang Dios magauban kanila ug magatabang kanila.

16 Karon ako nang nalangan kamo, sa miaging Domingo, mga duha ka adlaw, ug sa akong pagtoo. . . o, duha ka mga buluhaton, sa buntag ug sa gabii, ug kana nakapahimong malisud kaninyo. Akong nasabot nga kini. . . Ang pipila kaninyo halayo pa kaayo ang panaw, ug dili maka trabaho sa usa ka adlaw, ug uban pa. Busa bisan pa kung mogikan kita sa Domingo, Lunes, usa ka semana, ako na lang ipahibalo ang buluhaton alang sa sunod nga Domingo, kung itugot sa Ginoo, kita n'yo, gawas lamang kung ang congregasyon buut mopabilin sa tibuuk gabii. Kita n'yo, kana, anaa lang kana. . . Anaay daghan kaninyo!

Pila man ang gusto nga labi pang maayo kini karong gabii, atong tan-awon, nga anaay buluhaton karong gabii? Karon, ang gusto nga sa sunod pang Domingo, ipataas ang inyong kamot sa sunod? Ay na, sulosama ra kana. Uh! [May miingon, nga “Tabla, igsoon!”—Ed.] Unsay giingon? [“Himoon kini sa duha ka higayon.”] Uh! [Si Igsoong Ben Bryant nagaingon, “Ug, karong gabii, kaduha.”] Karon, karon, Ben! [Si Igsoong Branham mikatawa.]

17 Nakuha ko kining Mensahe, nga hataas, niining buntaga, apan ako-ako wala mahibalo kung unsaon lamang. . . Ug ako nahibalo nga mitabang ako sa paghimo sa mga lagda sa iglesia, apan diha niini, kung inyong namatikdan, ako miingon, “Gawas

lamang kung mag-teyp ako.” Kita n’yo? Busa, kini gi-teyp. Uh-huh. Busa tingali’g atong tinguhaon ang pagbalik sa duha ka higayon, karong gabii ug sa sunod nga Dominggo, dayon, buhaton kung itugot sa Ginoo, nakita ninyo. Karon, kon dili kamo makadungog sa pahibalo niining semanaha, nan moanhi kamo sa sunod nga Dominggo.

<sup>18</sup> Akong gikasubo ang pagpaanhi kaninyog kaduha nga sama niana, apan akong gibati kita wala nay apan diotay pang panahon. Ug hinumdumi gayud, kung ang panahon magairog na, kita dili na makapahimulos pagdugay niining prebilihio. Kita n’yo? Hinumdumi, anaay butang nga mahitabo. Tingali ang balaod mopahunong kanato, o si Satanas molihok sa inyong taliwala ug patibulaagon kamo. Mao kana sa kanunay. Kita n’yo? Adunay usa ka butang nga mahitabo, busa kita magpasalamat sa matag higayon nga magakatigum kita.

<sup>19</sup> Busa karon alang niadtong mga mopauli pa sa inyong mga puloy-anan, niining gabhiona, kini sama sa miaging Dominggo sa gabii, ako adunay lamang usa ka-usa ka hamubong Mensahe. Ug busa, kamo, kung gusto ninyo ang teyp niini, aba, among ipadala gayud kaninyo ang teyp kung kamo kinahanglan na mopauli sa inyong balay. O, dili kaha, ako mowali karong gabii, kung itugot sa Ginoo.

<sup>20</sup> Anaay akong sinulat kagahapon, o-o sa adlaw nga gisundan kagahapon, usa ka gamay’ng Mensahe nga akong gisulat gikan sa paghanduraw sa usa ka butang, ug kini kaniadto pa sa taas nga panahon. Adunay duha ka Mensahe, niana. Ingon sa nataliwad-an, ang usa kanila mao ang, “Usa ka nagatagas nga atabay,” o hain sa duha, “Ang pagpugas sa hangin ug ang pag-ani sa alimpulos,” usa ka Maayong Balita nga Mensahe. Niining buntaga maoy usa ka pagpanudlo. Ug busa, karong gabii, tingali’g akong igawali ang “Pagpugas sa hangin ug ang pag-ani sa alimpulos,” o hain sa duha, “Ang usa ka atabay nga nagatagas.”

<sup>21</sup> Ug, niining buntaga, buut kung pagabasahon gikan sa Balaang Kasulatan.

Ug maayo ba ang inyong kabutang? Moingon, “Amen.” [Ang congregasyon nagaingon, “Amen.”—Ed.] Maayo.

Karon akong gusto kaninyo, diha sa inyong mga Biblia, sa pag-abli uban kanako sa Basahon ni Oseas, kamo nga gustong mobasa. Ug atong basahon ang pipila ka mga berseculo gikan sa ika-6 nga capitulo sa Basahon ni Oseas, nga propeta.

Ug kita manindog.

<sup>22</sup> Minahal nga Dios, kami dili takus sa pagkupot niining maong Basahon dinhi sa among mga kamot, kay among nabasa sa Kasulatan nga walay tawo sa Langit o sa yuta, o sa ilalum sa yuta, nga takus o bisan sa pagkuha sa Basahon, o bisan sa pagtan-aw Niini. Oh, ug dihay miduol ang Usa nga sama

sa usa ka cordero nga gipatay; Iyang gikuha ang Basahon, kay Siya takus, ug Iyang gitangtang ang mga Timri niini. Ug kami nagapaabot Kaniya niining buntaga sa pagpadayag sa mga unod niini nga nahisulat sa Basahon, tungud kay kini mao ang Basahon sa Katubsanan. Ang tanang mga tinubos nahisulat dinhi niini. Hinaut nga among makita ang among dapit, niining buntaga, sa panahon nga among ginakabuhian. Kay among gipangayo kini sa Ngalan ni Jesus.' Amen.

*Umari kamo, ug mamalik kita sa GINOO: kay gipikas kita niya, ug kita pagaayohon niya; gisamaran kita, ug kita pagabugkosan niya.*

*Sa tapus ang duruha ka adlaw kita iyang pagadawaton: sa ikatolo ka adlaw pagabanhawon kita niya, ug kita magapuyo sa iyang atubangan.*

*Ug hibaloan nato, ug padayonon nato ang pag-ila sa GINOO: ang iyang paggula matuod gayud ingon sa pagdangat sa kabuntagon; ug siya moanhi kanato maingon sa ulan, maingon sa ulahi ug nahaunang ulan nga nagbisibis sa yuta.*

*Oh Ephraim, unsa ang pagabuhaton ko kanimo? Oh Juda, unsa ang pagabuhaton ko kanimo? Kay ang imong kaayo maingon man sa panganod sa kabuntagon, ug maingon sa yamog nga sa sayo mahanaw lamang dayon.*

*Busa gisapsapan ko sila pinaagi sa mga manalagna; sila gipamatay ko pinaagi sa mga pulong sa akong baba:ug ang imong mga paghukom maingon sa kadanag sa suga nga nagauna.*

*Kay ang kalolot maoy gikinahanglan ko, ug dili ang halad; ug ang kahibalo mahitungod sa Dios labi nga gikahimut-an ko kay sa mga halad-nga-sinunog.*

*Apan sila maingon sa mga kalalaken-an nanaglapas sa tugon: didto sila-didto sila nagmaluibon batok kanako.*

*Ang Galaad maoy ciudad nga ila niadtong nanagbuhat sa kadautan, ug kini nabulingan sa dugo.*

*Ug maingon sa panon sa mga tulisan nga nagahulat sa usa ka tawo, ingon niana ang panon sa mga sacerdote nagapamatay sa mga mangagi sa dalan: ug . . . nanagpakighilawas.*

*Sa balay sa Israel akong nakita ang usa ka makalilisang nga butang: didto ang pagpakighilawas maoy makita diha sa Ephraim, ang Israel gihugawan.*

*Ingon man, Oh Juda, adunay alanihon nga gipadala kanimo, sa diha nga bawion ko gikan sa pagkaulipon ang akong katawhan.*

<sup>23</sup> Ginoong Jesus, kutloa gikan Niini, pinaagi sa Imong Espiritu Santo, ang unod nga maoy gikatamong, samtang kami nagapaabot pa Kanimo. Sa Ngalan ni Jesus.' Amen.

<sup>24</sup> Karon, ang akong pagahisgotan niining buntaga mao ang: *Ang Pag-ila Sa Imong Adlaw Ug Ang Mensahe Niini*.

Atong nakita gikan sa pagtulon-an sa miaging Domingo, sa dihag kita natun-an, *Ang Fiesta Sa Mga Trumpeta*. Ug buut ko'ng tawagon ang inyong pagmatngon, karon, ang takna-ang takna sa Israel sa taknaan sa Dios.

<sup>25</sup> Karon atong gihisgotan ang pagtulon-an sa Dinominggong pagtoon, nga buut ko'ng inyong himatikdan ug maila ang panahon nga atong ginakabuhian. Hapit na kita matapus, maingon sa inyong nakita. Ug unya, pinaagi niini, inyong kinahanglan nga hisayran ang maong takna ug panahon, ug ang ilhanan ug ang Mensahe nga inyong pagadawaton.

<sup>26</sup> Karon, ingon sa gisugdan nato niadtong miaging Domingo. . . Atong gikaingon ang pagwali sa mga Trumpeta, ang katapusang Pito ka mga Trumpeta sa Biblia. Ug ako, sa akong kaugalingon, akong gihunahuna nga sila mapahigawas na maingon sa mga Timri. Apan akong namatikdan diha sa matag usa niining mga pag-abli nga may talagsaong butang nga nagakahitabo.

Ug ingon nga atong giwali ang *Pito Ka Mga Kapanahonan sa Iglesia*, ug hilabihan ang ilang kahingpit hangtud nga ang Espiritu Santo sa Iyang Kaugalingon mikunsad sa atong taliwala ug gipamatud-an kini, ug gibutang kini diha sa mga mantalaan, ug mikuyanap kini sa tibuuk nasud, ug gipakita kini diha sa bulan diha sa kalangitan, ug gipamatud-an kini kanato, mga semana ug mga bulan sa wala pa kini mahitabo, nga maingon gayud niana, sa kahingpit. Dinhi sa tabernaculo Iya kining gipadayag. Dinhi sa . . . diha sa panahon, Iya kining gipahibalo. Diha sa bulan ug sa adlaw, Iyang gipahibalo kini. Ug diha sa kahintang sa mga nasud niining panahona, Iya kining gipahibalo; samtang ang herarkiya sa Roma milakaw ug mibalik sa Palestina, ang gitoohan nga maoy unang papa nga mibalik sukad kang (ilang giangkong) Pedro ingon nga maoy papa. Karon, kato usa ka katingalahan kaayo!

<sup>27</sup> Unya, atong nakita, diha sa Pito ka mga Timri nga naglilong niining tanang mga tinago.

Ako nga wala mahibalo kung unsay akong gidibuho diha sa pisara, alang sa Mga Kapanahonan sa Iglesia. Ako wala gayud. Ang Dios nasayud. Pinaagi lamang sa panan-awon, akong gidibuho kato. Sa walay pagkasayud nga ang Dios, usa ka tuig ug unom ka bulan human niana, magapanghimatuod niini diha sa kawanangan, pinaagi sa bulan, ug gipabutho kini diha sa nasudnong mantalaan. Wala ako mahibalo niana. Ako wala

mahibalo nga anaay usa ka katingalahang pagkapalong diha sa bulan, aron maghulagway niining Panahon sa Laodicea.

<sup>28</sup> Karon, diha sa mga mantalaan, inyo lamang makita ang unom ka kapanahonan. Maoy tungud kay ang iglesia sa Laodicea mingitngit sa hingpit. Ug kung inyong namatikdan ang espirituhanong aplikasyon, maingon nga ang Dios gipahimutang kini diha sa langit. Sa diha akong gipahimutang kini dinhi sa yuta, akong gibinlan ug usa ka gamay'ng luna, maingon sa inyong nakita, usa lamang gayud ka gamay'ng kahayag. Kana sa wala pa lamang ang maong Pinili pagatawagong gikan sa yuta, ang hinungdan nga akong gibutang kini diha alang sa ikapitong panahon. Apan sa diha nga ang Dios gibutang kini diha sa kalangitan, napalong kini sa hingpit gayud, nagkahulogan nga tingali'g ang katapusang usa gitawag na gikan nianang Panahon sa Laodicea. Wala kita mahibalo. Mahimong adunay wali niini.

<sup>29</sup> Karon matikdi pag-usab, sa wala pa ang-ang Pito ka mga Timri, nga niini walay akong hunahuna nga ingon niadtong kahimtanga.

Dinhi sa tabernaculo Siya naghisgot niini, ug mipadala kanako ngadto sa Tucson, Arizona, nga mitug-an kaninyo sa tanan kung unsay mahitabo. Ug dihay tawo nga mitambong nga naglingkod, karon, nga atua didto aron pagsaksi niini nga panghitabo sa tukma gayud nga gikasugilon dinhi nga mahitabo, "Ang Pito ka mga Manolunda moabot." Dayon ang mantalaan gitaho kana, ug ang mga magasin, sa tibuuk nasud, "Katingalahang naglingin nga Kahayag diha sa dagway nga piramid," sama sa akong gidibuho dinhi ug gipakita kaninyo. Misaka diin atua kadtong mga Manolunda nagatindog, ug misaka sa gihabogon nga katloan ka milyas, ug kaluhaan ug pito ka milyas ang gilapdon; o kaha kaluhaa'g pito ka milyas ang gihabogon, ug katloan ka milyas ang gilapdon, nakalimot na ako kung hain niadto. Ug nakita sa tibuuk nasud, diha sa ibabaw lamang sa Tucson, Arizona, diha gayud diin kini nahitabo, sa samang takna.

<sup>30</sup> Kita n'yo, ang-ang Biblia, ang Dios dili lamang...Kini dili lamang usa ka tawo nga nagasulay sa-sa pagpugus sa usa ka butang diha kaninyo, kondili aron ipadayag kaninyo ang espirituhanong gayud nga aplikasyon niining taknaa.

<sup>31</sup> Ug unya, ang sunod nga Mensahe, nga nagbukas sa Pito ka mga Timri, nga maoy naghuman sa tanang mga gililong nga mga tinago sa Biblia, ang mga Doctrina, ug uban pa. Kinsa, ang kalibutan sa walay pagtahud miasdang batok niini karong mga adlaw, miasdang batok Niini ug nagaingon nga Kini sayop, *kini, kana*.

<sup>32</sup> Dinhi sa miaging adlaw sa Arizona, misumpay-sumpay og mga gi-teyp, aron ipalitok kanako ang mga butang nga dili ko gisulti. Hinumdumi lang ang panan-awon bahin sa pamahayag



sa Arizona! Ang Biblia nag-ingon, “Labi pang maayo alang kaninyo nga mahigtan kamo og bato diha sa inyong liog.” Ug ang lain pang butang, nga, “Bisan kinsa,” magwawali man siya o unsa man siya, “nga mokuha sa usa ka Pulong gikan Niini, o magadugang sa usa ka pulong diha Niini!” Mga tawo nga mopahimutang sa ilang kaugalingong hubad diha sa Pulong maingon nga gikahatag na Kini, nagasulay pa sa pagpasulti Niini sa usa ka butang nga wala ko isulti, ug, dili akong Pulong; Kini maoy Iyang Pulong. “Kinsay magadugang diha niini, o magakuha!”

<sup>33</sup> Ug unya, diha sa panan-awon, atong nakita kining mga propeta nga nangatuyok pabagsak, sama sa akong gisaysay kaninyo, sa akong pagtoo, sa mga Dominggong nangagi. Kini tanan mahitabo. Matud ko, “Pagpahilayo lamang gikan niini.” Samtang nakigbisog pa ako niini, nan dili makigbisog ang Dios niini. Apan atong tugotan nga itugyan kini Kaniya. Siya nga Kinsa maoy Bugtong moatiman niini. Kita n’yo?

<sup>34</sup> Karon atong namatikdan, sa miaging Dominggo, nga dihay . . . nagwali sa mga adlaw sa fiesta. Ug dihay fiesta sa pentecostes. Ug sa taliwala sa fiesta sa pentecostes ug sa fiesta sa mga trumpeta, kana maoy usa ka hataas nga panahon; sibo gayud sa kalim-an ka adlaw tali sa pentecostes ug sa fiesta sa mga trumpeta. Ug ang kalim-an ka adlaw, nga, *pentecostes* nagkahulogan sa “kalim-an.” Kadto mao ang pagtabyog sa mga binangan, o ang pagsa- . . . Ang inunahang mga bunga nga gidala. Ug atong makita nga kadto maoy larawan kaniadto, uban sa tiunay’ng inunahang mga bunga, nga nagkahulogan sa inunahang mga bunga sa Espiritu Santo nga igabubo sa ibabaw sa katawhan.

Ug atong makita, kaniadto, nga kadtong kalim-an ka adlaw nadawatan sa mga Gentil, ni kinsa, “Ang Dios nagtawag gikan sa mga Gentil usa ka katawhan alang sa Iyang Ngalan,” ang fiesta sa pentecostes. Ug kita nagsubay na diha nianang hataas nga fiesta sa pentecostes.

<sup>35</sup> Karon, sa pagkatinuod, gikan sa kalim-an ka adlaw, kini tukma gayud nga pito ka mga adlaw’ng igpapahulay. Ug ang pito ka mga adlaw’ng igpapahulay naglarawan sa Pito ka mga Kapanahonan sa Iglesia, aron pagatawgon sa panahon sa fiesta pang-pentecostes, sa Pentecostes, aron pagtawag sa usa ka katawhan gikan sa mga Gentil alang sa Iyang Ngalan.

Karon, sa katapusan niining pito ka mga adlaw’ng igpapahulay, nga sukad pa, adunay Adlaw sa Pagpasig-uli, nga mao ang Pito ka mga Trumpeta. Ug ang Pito ka mga Trumpeta maoy pagtawag sa adlaw sa pagbalata, pagbalik alang sa Halad, o, sa Pagpasig-uli. Ug atong makita dayon, nga, ang Israel, ang Pito ka mga Trumpeta alang lamang sa Israel.

<sup>36</sup> Ug, unya, nganong dili man Niya itugot kanako ang pagwali sa Pito ka mga Trumpeta. Ako gani andam na sa pagpahibalo niini, naandam na ang tigumanan ug ang tanang mga butang nahan-ay na, aron pagwali sa Pito ka mga Trumpeta. Ug matud ko, “Anaay usa ka butang nga nagapasamok kanako pag-ayo,” matud ko. Kami nagpadayon sa pagpanglihok, ug si Billy ug kaming tanan, naninguha aron maandam ang tanang butang ngadto sa mabugnaw nga gambalay, alang niining mosunod nga semana, alang sa Pito ka mga Trumpeta; may mga napulo ka adlaw, o walo ka adlaw, anaa pay awditoryum sa iskwelahan. Apan ang Espiritu Santo dili motugot kanako nga buhaton kini, tungud sa pipila ka hinungdan, ug natingala ako kung ngano.

Ug sa akong pagsulod aron mag-ampo. Akong gisultihan ang akong asawa, nga “Mosulod sa ako.” Ug sa pagkamatitud-anon ako miluhod sa atubangan sa Dios, aron mag-ampo. Ug Iyang gipadayag kanako nga silang Pito ka mga Trumpeta mitingug sa ilalum sa ika-Unom nga Timri, ug ako nang nawali kini, sa pagka-supernatural. Kita n’yo, kini mao ang kamot sa Dios, ang kalangkuban sa butang. Kini nagapahinungod sa Israel, ug atong nasaysay na kini ilalum sa ika-Unom nga Timri; kamong tanan kinsa nga nakasabot na niana, kon giunsa ang pagpanglutos sa mga Judio.

<sup>37</sup> Ang panahon sa mga Gentil sukad ania niining fiesta sa pentecostes.

Ang mga Trumpeta, sa ilalum. . . tanan sila gipatingug na ilalum sa ika-Unom nga Timri. Ug ato nang nasaysay kini sa miaging Dominggo, ilalum sa fiesta sa mga trumpeta, kung kamong tanan buut masabtan kini. Unsa may buhaton niini? Aron padalion ang mga Judio, gikan sa tanang dapit sa kalibutan, sa pagpamalik sa ilang yutang natawhan. Kinahanglan nga anaa kini diha. Ug ang pag-abli sa mga Timri, ilalum sa ika-Unom nga Timri, ug ilalum sa. . . Ang Pito ka mga Trumpeta mitingug na diha sa-sa ika-Unom nga Timri.

<sup>38</sup> Karon, ang Mensahe sa ikapitong manolunda maoy moabli sa tinago sa mga Timri, nagatawag sa mga magbubuhat nga Gentil sa naghingapus nga takna aron magadawat sa samang suhol nga nakuha sa nahaunang mga mamumuo. Kita n’yo?

Karon, si Jesus nagtudlo niini. Siya miingon nga anaay mga tawo nga miadto sa gapasan. Sila mga sinuholan. Ug sa nakabuhat na sila, sa sayong kabuntagon, ilang nadawat ang-ang-ang panahon, usa ka salapi alang sa maong adlaw. Ug dayon sa panahon sa kaudtohon, dihay laing misulod ug namuo. Ug dayon sa ulahing takna, nga mao kanang katapusang takna sa adlaw, miabot ang lain pa ug nakadawat sa samang suhol kanila sa nahaunang takna sa adlaw; sa katapusang takna.

<sup>39</sup> Kini hingpit kaayo, kon giunsa sa mga mensahero sa unang takna uban sa Pulong, uban sa Maayong Balita, uban

sa Kamatuoran, sila nahiabot sa Adlaw sa Pentecostes. Unya adunay mangiub nga panahon nga mipalolong kanila. Dayon sa panahon sa kaudtohon, si Luther, ug si Wesley, ug uban pa kanila, miabot. Ug unya adunay moabot nga Mensahe sa panahon sa kagabhion, ug aron sa pagdawat sa samang butang nga ilang nadawatan sa sinugdanan. Ang Mensahe sa panahon sa kagabhion maoy magpasig-uli pagbalik, aron dalhon pabalik kanang samang butang pag-usab.

<sup>40</sup> Ug hinumdumi ang panan-awon sa miaging semana, nga sa dihang ang Pangasaw-onon nahimong... ang pasiunang pasundayag niini. Nahiabot ang Pangasaw-onon, maanyag, diha sa panan-awon. Ug ako, sa walay pagdahum bahin niini; igo lamang nagalingkod didto nagatan-aw sa gawas. Ug ania karon mitungha ang Pangasaw-onon. Akong nadungog ang usa ka Tingog sa akong kilid, miingon, “Ania ang pasiunang pasundayag sa Pangasaw-onon.” Ug Siya miagi. Akong namatikdan Siya, sa kahimtang nga mao Siya, matahum kaayo, maanyag, batan-on. Siya nagalakaw sa Iyang naandang lakang, dili usa ka paso; diha lamang sa lakang sa usa-usa ka babaye, diha sa ilang paglakaw nga madanihon, sama sa dalaga. Mao kana ang matang sa Iyang paglakaw, nga miagi sa akong wala *nining* dapita, ug Siya nawala sa akong panan-aw.

<sup>41</sup> Ug unya Iya akong gipaliso sa tuong dapit, ug Iyang gipakita kanako ang matag iglesia sa dihang minggula sila gikan sa mga kapanahonan. Ug, oh, kon unsa ang pagkalaw-ay kaayo! Ug ang katapusang usa mao kining iglesia sa katapusang panahon, nga gidumala sa usa ka babayeng makalulumay. Ug sila nagbisti nga makihilawason, mahugaw kaayong tan-awon! Ug sila nagamartsa padulong ngadto sa panahon sa twist ug rock-and-roll. Ug kadtong mga babaye milabyog sa ilang kaugalingon gayud maingon sa mga pagpakiay-kiay, papel lamang ang nagtabon, nga abohon, tigpakaro'g-ingnon, ang mangi-... Ang abohon anaa sa tungatunga sa puti ug itum, nga maoy malimbungong bulok. Ang abohon dili puti ni itum. Usa kini ka bulok nga malimbungon. Ug sama sa papel nga abohon, nagatabon sa ilang atubangan, nga may laso nga mitabon sa ilang atubangan sama sa sayal nga hula, ug bug-os nga walay sapot gikan sa ilang hawak pataas. Ug mipaso ngadto sa... o sa panahon, o nagakiay-kiay, ug nagasayaw uban niadtong tugtog, mipadayon paglakaw. Ug miingon, “Mao kana ang iglesia.”

<sup>42</sup> Ug sa dihang milabay kini kanako, daw mautas ang akong kasingkasing. Ako namalandong, “Kung mao kana ang gipaningkamotan nga ipaatubang kang Cristo, ingon nga usa ka Pangasaw-onon? Sa tanan nga mga paghago ug mga butang nga gipahimutang sa tawo, sa pagpaninguha aron magpagula sa usa ka Pangasaw-onon alang kang Cristo; ug ang usa ka malaw-ay, mahugaw, mahugaw nga tan-awon sama sa usa ka bigaon nga

maoy mahimong Pangasaw-onon ni Cristo?” Kini nakapasakit pag-ayo sa akong kasingkasing.

<sup>43</sup> Ug sa dihang siya milabay, human nga siya . . . Nagapaduol sa atubangan diin kami nagatindog, iyang ginakuptan ang papel sa iyang atubangan, nagakiay-kiay, ug mitabyog-tabyog, ug mipalihok-lihok sa iyang kaugalingon diha sa usang kilid ug dayon sa pikas kilid, samtang siya naglakaw, sama sa bag-ong mga sayaw nga ilang gisayaw niining panahona, nagagamit sa iyang kaugalingon diha sa usa ka makihilawasong buhat samtang siya padayon nga nagapaso.

<sup>44</sup> Ako dili manubag niining mga butanga. Ako lamang masulti kon unsa ang akong nakita. Ug ang Dios ingon nga akong Maghuhukom, apun kadto mao ang iglesia gikan sa U.S.A.

<sup>45</sup> Karon, sa diha nga siya milabay, ang tibuuk likud nga bahin walay tabon man lang. Ug unya samtang siya milabay, akong gibati ang pagkaluya ug nagmasakiton.

<sup>46</sup> Dayon Siya miingon, “Ang Pangasaw-onon ipasundayag na pag-usab.” Ug ania karon ang Pangasaw-onon diha sa luyo niya, ang mao ra gayud nga Pangasaw-onon nga milabay sa sinugdan. Dayon ang akong kasingkasing milukso sa kalipay, sa pagkasayud nga anaay Pangasaw-onon. Ug siya gimugna sa mao ra gihapong butang, ug nabistihan sa mao gihapong butang, kanang maong Usa mao katong sa sinugdan. Siya mao ang pagatawgon.

Ug ako nahibalo nga kana mao ang Kamatuoran. Kung kana dili tinuod, nan ang matag panan-awon nga akong nakita kaniadto mga sayop. Ug ang bisan kinsa nahibalo, nga, walay usa ka butang sukad nga Iyang gitug-an kanato gawas sa kon unsa ang Kamatuoran. Kini mahitabo gayud, sa . . .

<sup>47</sup> Ug makita ba ninyo, dayon, ang kahugaw sa modernong iglesia, nga nagatawag sa iyang kaugalingon nga usa ka “iglesia”?

<sup>48</sup> Sama sa nag-ingon niadtong miaging adlaw; si Igsoong Ruddell, akong hamiling igsoon, nagatindog nga nagsandig sa dingding diha karon. Nga, nakita niya kini nga sama sa usa ka saha diha sa balagon. Ug among gihisgotan kini didto sa lawak sa miaging adlaw. Ug nasamok kaayo si Igsoong Ruddell mahitungod sa mga kahimtang sa panahon ug sa-ug sa pagbati sa espiritu sa mga kaiglesiahanan karon, kung unsa kini sa nagsugod sa pagkahugno. Mga ministro nga nakagikan pa sa nagkalainlaing dapit, ug sa mga pagpakighinabi dinhi, nagapangutana, “Unsa ba’y nahitabo, Igsoong Branham? Unsa ba’y nahitabo?” Oh, sus!

<sup>49</sup> Nangutana kanako si Igsoong Ruddell, “Nagkinabuhi ba sila sa espiritu ni Satanas, o unsa?”

<sup>50</sup> Matud ko, “Wala, ang saha nabuhi diha sa kusog sa balagon.” Kini nabuhi tungud kay, ang bunga sa citrus, ang-ang limon magatubo sa kahoy’ng kahil; apan kini dili mamunga og mga kahil, bisan pa kung kini nabuhi pinaagi sa kinabuhi niini.

Ug ang iglesia, sa ngalan ra, usa lamang ka saha nga sinumpay, nga nagkinabuhi ilalum sa ngalan sa relihiyon, ilalum sa ngalan sa iglesia. Ang Catolico ug Protestante, mga saha lamang, nagasuyop sa . . . gikan sa kusog sa Punoan; ug sa gihapon nagapamunga sa bunga kung unsa sila, tungud kay sila mabag-o. Sila wala kaniadto sa orihinal, sa gikatagana nang daang laraw sa Dios, mao kana ang hinungdan nga ilang ilimu ug Pulong ug mamunga ug laing matang sa bunga. Ang matuod gayud nga kahoy, sa gamut niini, gikatagana nang daan aron mamunga’g mga kahil diha sa kahoy’ng kahil.

Si Jesus miingon, “Ako mao ang Punoan sa parras; kamo mao ang mga sanga.”

<sup>51</sup> Apan kung kanang maong kahoy mosanga ug usa pang sanga, kini mamunga sa iyang tiunay’ng bunga. Ug kinahanglan nga anaay pagpasig-uli niining tanang mga butanga, mismo sa kinatumyan sa Punoan. Magkaadunay, mousbong, nga pagpasig-uli, usa ka Kahayag sa kagabhion aron pagdagkot Niini ug aron Kini mahusto. Apan kini magagikan sa Punoan, dili sa usa ka denominasyon nga gisumpay ra Niini; kondili ang tiunay’ng bunga sa Pulong. Kini mogula sa panahon sa kagabhion. “Ug maanaay Kahayag sa panahon sa kagabhion.” Gikinahanglan ang Kahayag aron sa pagpahinog Niini.

<sup>52</sup> Tan-awa kung unsa ang kahingpit sa maong Kasulatan! “Usa ka adlaw nga dili mahimong tawgon nga adlaw o gabii.” Ang bunga dili mahinog gawas kung ang adlaw nagapahinog niini. Bisin pa’g unsa kadaghan ang imong wali, bisin unsay imong pagabuhaton, kini dili mahinog, kini dili mahimong madayag, dili kini mahimong mapamatud-an; pinaagi lamang Kaniya nga Kinsa miingon, “Ako mao ang Kahayag sa kalibutan,” ang Pulong. Busa kinahanglan nga anaay mogula nga usa-usa-usa ka Gahum, ang Espiritu Santo Mismo, aron magpahinog, o aron magpaluyo, o magpamatuod, o himoong dayag niana kung unsay Iyang gitagna nga mahitabo niining adlaw. Ang Kahayag sa kagabhion maoy mohatag niana. Daw sa unsa nga panahon!

<sup>53</sup> Ang Pangasaw-onon milatas diha sa maong kahimtang nga ana Kaniya kanhi sa dihang Siya atua sa sinugdan. Apan ako nagabantay Kaniya nga nagatipas sa Iyang lakang, ug naningkamot sa pagpabalik Kaniya. Karon, daghan ang mahimong ikasulti niining mga butanga, sa maong adlaw nga atong gipuy-an.

<sup>54</sup> Karon, si Oseas miingon, sa 6:1, “Balik ngadto sa Ginoo.” Hinumdumi, siya miingon nga sila magkatibulaag, ug sila

nagkatibulaag gayud. Siya miingon, nga “Sila mamalik ngadto sa Ginoo, tapus sila gipatibulaag, ug Iyang, bugkusan sila.” Matikdi, “Balik. . . Magkatibulaag; ikaduha. . . Sila gisamaran, ug gibutahan.” Kana mao kung unsay hingpit nga nahitabo. “Siya magaaayo kanato, ug magabugkus kanato.”

Sama sa Ezequiel 37, “Ang mga uga nga bukog, ang walog napuno sa mga uga nga bukog.” Nakita kini ni Ezequiel, ang ilang pagbalik usab.

Dayon matikdi, si Oseas miingon, “Tapus sa duha ka adlaw! Tapus sa duha ka adlaw Siya mobalik ngadto kanila. Siya magadawat kanato ug magahatag kanato, magapukaw kanato.” Karon, ang *pagpukaw* wala magpasabot nga “pagkabanhaw.” Ang *pagpukaw*, didto, mao ra nga pulong nga gigamit sa uban pang dapit, akong bag-o lang gisusi kini, nagakahulogan, “usa ka pagkapukaw.” “Iyang pagapukawon kita tapus sa duha ka adlaw.” Kana mahitabo, “Diha sa ikatulo ka adlaw Iyang pagapukawon kita pag-usab, human nga Iyang gipatibulaag kita, ug gibutahan kita, ug gisamaran kita.”

<sup>55</sup> Nahibalo kamo, ang mga Judio gibutahan sa labing katuyoan nga kita makakita. Sila gisamaran, ug gipatibulaag, ingon nga usa ka nasud, ug misalikway sa ilang Mesiyas; aron kita makadawat sa Mesiyas, aron nga anaay usa ka katawhan nga tinawag gikan sa mga Gentil alang sa Iyang Ngalan.

<sup>56</sup> Karon, ang lalaki mitungha, ug ang babaye mikuha sa iyang ngalan. Kining nabutahan nga mga Gentil nga kinsa dili makakita nianang maong Ngalan, “ang Ginoong Jesus Cristo,” diha sa bautismo! Sakit ra kini kaayo, apan kinahanglan nga maingon niini. Ang mga Judio, sila kinahanglan-sila kinahanglan nga dili makakita niana. Anaay usa lamang nga makakita niini; mao kanang gimbut-an nang daan aron makakita niini. Kondili man, dili ka gayud makakita niini.

Ang mga Judio dili makakita niana ingon nga ilang Mesiyas. Ug, bisan pa niana, sila mga manggialamon ug mga teyologo, tawo nga bantugan sa kaalam, nagbasa sa mao ra nga Biblia nga inyong gibasa. Karon, tapus nga gikapahibalo na kini kanato, atong makita kini sa matin-aw, nga kadto mao ang Mesiyas. Apan, sila dili makakita niini, ni makakita sila niini karon. Sila gipanagna nang daan nga mabutahan, usab.

<sup>57</sup> Ang iglesia, niining adlaw, gipanagna nang daan nga mabutahan, aron isalikway ang Mensahe sa panahon sa kagabhion. Ang Pinadayag 3 nag-ingon gayud, “Ikaw alaut, makalulooy,” matikdi ang kahimtang sa pangasaw-onon sa miaging gabii, o ang iglesia, “hubo, buta, ug wala mahibalo niini.” Ginoong Jesus, kaloy-i kami! Ang Biblia nag-ingon nga siya “hubo.” Wala ko gayud kini makita hangtud nga karon pa lamang. Ang iglesia sa Laodicea hubo. Ug sa dihang

siya mitungha sa miaging gabii, siya “hubo,” wala gayud nakamatikod niini, “ug wala nahibalo niini.”

<sup>58</sup> Oh, daw sa unsa ka mapasalamaton! Unsa, dili ikahibulong nga kita mapasalamaton kaayo! Akong gibati nga dili paigo ang atong pagkamapasalamaton alang sa mga butang nga gipadayag sa Dios alang kanato.

<sup>59</sup> “Hubo.” Ug ang mga panan-awon nagtug-an, gipakita kanako nga siya hubo ug wala mahibalo niini, ug “gibutahan.” Maingon nga ang Israel gibutahan aron ang mga Gentil makasulod, karon ang mga Gentil gibutahan aron sa ingon ang Pangasaw-onon mahipagawas ug ang Israel makadawat sa fiesta sa mga Trumpeta. Hingpit kaayo!

<sup>60</sup> “Tapus sa duha ka adlaw pagapukawon kita Niya, o hatagan kita’g pagkapukaw, nagadala sa paghiusa kanato, ang mga Judio,” nagahisgot bahin niining mga Trumpeta karon. Ug Iyang... “Ug kita magapuyo sa Iyang atubangan, o makabaton sa Kinabuhing Dayon. Kita n’yo, kita maatua sa Iyang atubangan.” Ang Biblia nag-ingon dinhi sa Oseas, matud pa, “Ug kita magapuyo sa Iyang atubangan; Kinabuhi, makabaton ug Kinabuhi sa Iyang atubangan.” Mao kana ang Iyang Kaugalingong Kinabuhi, Kinabuhing Dayon, “makabaton ug Kinabuhi sa Iyang atubangan.”

“Siya nga nagakinabuhi sa kalipayan patay na samtang siya buhi pa.” Busa kita... nagsaad nga ang Israel sa gihapon makabaton ug Kinabuhi sa Iyang atubangan. Dugay na siyang namatay, diha sa mga panghitabo, ug diha sa fiesta nga pang-pentecostes.

<sup>61</sup> Karon matikdi, pag-ayo. “Dayon tapus sa duha ka adlaw.” Karon, wala kana magpasabot nga duha ka kaluhaa’g-upat-ka-takna nga mga adlaw, kay anaa nay... Kana nahitabo na kaniadto pa, sulod na sa gatusan ka mga katuigan ang nangagi. Kita n’yo? Kini nagkahulogan, “duha ka mga adlaw diha sa Ginoo,” human sa duha ka libo ka mga tuig. Karon, nahibalo ba kamo kung unsa ang gidugayon niana sukad niadtong panahona? Kini kaluhaa’g pito na ka gatus ka tuig sukad niadto, kay dinhi sa Oseas kini b.c. 780. 1964, kita n’yo, kini kapin na sa kaluhaa’g pito ka gatus ka tuig ang milabay. Siya miingon, “Tapus sa duha ka adlaw, sa ikatulo ka adlaw, Siya magapukaw kanato pag-usab, ug magahatag kanato sa Kinabuhi sa Iyang atubangan.” Anaa ang inyong mga Trumpeta nagasulod na. Mao kana ang takna nga ania kita, ang adlaw nga atong gipuy-an.

<sup>62</sup> Karon, nagkatibulaag sila, gibutahan, gitipok, ug halayo pa sa ikatulong adlaw. Nakita ba ninyo kini? Nagkatibulaag sila, gikan sa Palestina, hangtud sa tibuuk kalibutan. Sila gibutahan, aron isalikway ang Mesiyas. Ug karon nagkatigum na sila sa ilang yutang natawhan, andam na alang sa mga Trumpeta, aron ilhon ang Pagpasig-uli.

Maingon sa gisulti sa Biblia, “Sa dihang ilang madawat na Kini, ug makita Siya nga may mga ulat sa lansang,” human sa paglalin sa Iglesia, “ug sila moingon, ‘Diin Mo man nakuha kining mga ulat?’ Siya mitubag, ‘Didto sa balay sa Akong mga higala.’” Ug Siya miingon, “Ilang lainon, ang matag banay, ug manghilak ug magbakho, sa mga adlaw, sama sa banay nga nawad-an sa ilang bugtong anak.” Hinumdumi, kanang fiesta sa mga Trumpeta maoy mohimo niana. “Aron magbakho, magminatay tungud sa gipatay nga Halad,” ug nga ilang gisalikway Kini.

<sup>63</sup> Sila diha na sa ilang yuta. Sila nagkatibulaag, gibutahan, ug karon gitipok na. Ug kini tua tanan nailalum sa nianang ika-Unom nga Timri, ang ilang Pito ka mga Trumpeta. . . mitingug aron sila pagatigumon, ang ika-Unom nga Trumpeta. Ang ika-Pito mao “kanang Dakung Trumpeta,” nga atong gihisgotan sa miaging Dominggo. Ang ika-Unom nga Trumpeta mitingog ilalum sa ika-Unom nga Timri. Sama ra sa atong ika-Unom nga Timri nga gibuksan, ang tanang butang sa samang higayon; lamang, kining ilaha gipatingog tanan sa makausa ra; diin, kita duha na ka libo ka katuigan sa fiesta pang-pentecostes.

<sup>64</sup> Karon, kaluhaa’g pito ka gatus ka katuigan sukad niadtong panahona. Siya nag-ingon, “Sa ikatulo ka adlaw, kita pagatigumon pag-usab. Tapus sa duha ka adlaw, diha sa ikatulo ka adlaw, kita pagatigumon pag-usab, ug magbaton sa Kinabuhi sa Iyang atubangan.” Nakita ba ninyo ang saad? Ang takna sa hingpit gayud gisulat diha sa dingding. Atong nakita kung hain na kita nagapuyo karon.

<sup>65</sup> Karon anaa na sa yutang natawhan, nagapaabot sa fiesta sa mga Trumpeta, o ang pag-ila sa Pagpasig-uli, ug sa pagpaabot sa Pagbalik, aron sa pagbangotan tungud sa ilang pagsalikway sa unang higayon nga ilang gisalikway Kini. Sila anaa na sa yutang natawhan alang niana, nagapaabot. Unsa man ang tanan nilang. . . Ang matag butang gikapahiluna na.

<sup>66</sup> Ingon nga usa ka ministro sa Maayong Balita, ako wala nay makita nga nahibilin pang butang gawas ang pagbiya sa Pangasaw-onon. Ug ang Pangasaw-onon kinahanglan nga pagalalinon sa dili pa nila maila kung unsay nahitabo. Gihimo silang bihag, nagkatibulaag. . . Ang akong gipasabot, nagkatibulaag sila, gibutahan, ug karon nagkatigum na. Unsa pay nahibilin? Ang Pangasaw-onon nga pagakuhaon. Nagapaabot alang sa pagbiya sa Pangasaw-onon, aron ang ilang mga propeta sa Pinadayag 11 makatawag kanila ngadto sa fiesta sa Trumpeta, aron ipasabot kanila kung unsay ilang nabuhat.

<sup>67</sup> Hinumdumi, diha gayud sa tungatunga niadtong mga Timri, mitungha ang ika-Unom nga Timri. Ug adunay usa ka gatus ug kap-ata’g upat ka libo, pinili ug tinawag. Ug sa tungatunga sa ika-Unom ug ika-Pitong Trumpeta, ang



Pinadayag 11 nagatungha mismo diha sa han-ay gayud sa ika-Unom nga Timri.

<sup>68</sup> Aron unsay pagabuhaton? Unsa may pagabuhaton niini? Ug kini mao ang pagpatungha sa duha ka mga saksi, si Moises ug si Elias, mga propeta. Kinsa, ang mga Judio nagtoo lamang sa ilang mga propeta. Ug sila magatungha inubanan sa mga ilhanan sa mga propeta, ug ang ilang mga buhat iya gayud sa propeta, tungud kay sila nagbuhat gayud sa tukma.

Nagapakita'g usa ka butang, nga, ang tawo, kung ikaw mamatay o unsa man, kung mobiya ka niining kalibutana, ang imong kinaiya dili nagausb. Kung ikaw bakakon karon, bakakon ka sa gihapon didto. Kung ikaw sapoton dinhi, ikaw sapoton didto. Kung ikaw maduhaduhaon dinhi, ikaw maduhaduhaon didto. Mga kalalaken-an ug kababayen-an, panahon na sa pagpaamgo sa inyong mga kaugalingon ug sa pagsusi sa inyong kaugalingon, ug tan-awon kung asa kita nagabarog, kay ang kamatayon dili nagausb niini.

<sup>69</sup> Sila nangawala na sulod sa duha ka libo ka mga katuigan. Si Moises sa hapit kaluhaa'g lima na ka gatus ka tuig, ug si Elias sukad pa kaniadto. . . Hapit na magkaluhaa'g lima ka gatus ka katuigan sa pagkawala ni Elias, ug si Moises wala na, ug ania karon sila mobalik sa mao ra nga kinaiya ug mobuhat sa samang mga butang.

Ang kamatayon walay mahimo ngadto sa usa ka tawo gawas sa pag-usab sa iyang dapit nga puloy-anan. Dili nagausb sa imong kinaiya. Dili nagausb sa imong pagtoo. Dili nagapausab ug bisan unsa kaninyo gawas sa inyong puluy-anan.

<sup>70</sup> Busa, hain nga matang sa kinaiya ang imo niining buntaga! Kung ikaw usa ka maduhaduhaon sa Pulong sa Dios, ikaw maduhaduhaon sa gihapon didto. Dili ko igsapayan kung unsa ka kabalaan, giunsa mo pagkinabuhi, ug unsa kamaayo ang imong pagkinabuhi, kini dili makapausab kanimo bisa'g gamay sa kamatayon, ang imo lamang dapit nga gipuy-an. Ug kung dili nimo madawat ang kinatibuk-ang Pulong sa Dios sa paagi nga gisulat Kini, dili mo na kini mahimo Didto; busa, ayaw'g kabalaka, ikaw dili makaadto Didto.

Imo kinahanglan nga dawaton Kini diha sa kinatibuk-an Niini, diha sa gahum sa pagpanghimatuod Niini ug sa Pinadayag kung unsa Kini, dayon ikaw mahimong kabahin Niini. Ang Iyang Pulong lamang maoy Iyang banhawon, sama sa Iyang gibuhat sa Iyang Pulong sa nahaunang buntag sa Pagkabanhaw. Iyang Pulong lamang maoy migula, ug kadtong nangamatay sa Iyang Pulong, nagatoo sa Iyang Pulong ug nagpanghimatuod sa Iyang Pulong.

<sup>71</sup> Matikdi, karon, milabay na kana sa kaluhaa'g pito ka gatus ka katuigan. Matikdi, sila nagkatibulaag, sila gibutahan, ug

karon sila gikatigum na. Karon, ang sunod nga butang mao ang ilang pagdawat sa Kinabuhi.

<sup>72</sup> Ug ang mga Gentil gitawag na pagawas. Ang Pangasaw-onon andam na. Ang Paglalin haduol na. Mahunahunaan ba nato kana? Makatoo ba kita sa tinud-anay niana? Usa ba kini ka sugilanon nga nasaysay na? Usa ba kini ka tinumotumo, alang kanato? Usa ba kini ka butang nga murag tinuod? Usa ba kini ka butang nga kita, nga tagagawas, makatoo? O, usa ba kini ka butang nga ania kanato, nga kabahin kanato, nga labaw pa kini sa kinabuhi kanato? Unsang pagbati nga sa atong paglingkod, niining buntaga, dinhi sa tabernaculo? Hinumdumi, kini mahimong usa ka gamay'ng panon ang nagadawat Niini.

<sup>73</sup> Karon sa yutang natawhan, nagapaabot alang sa mga Trumpeta. Karon nagapaabot alang sa pagbiya sa gamay'ng Pangasaw-onon, aron ang Pinadayag 11 matuman. Ang panahon sa iglesia mihunong na; ang mga Timri nabuksan na, kana nagpamatuod kung unsay ilang gibiyaan diha sa panahon sa iglesia, ug ang Mensahe gikatugyan na. Ang Israel anaa na sa eksena, halleluia, andam na alang sa fiesta sa mga Trumpeta.

<sup>74</sup> Oh, kamong mga tawo sa ubang kayutaan diin inyong madungog kining maong teyp, dili ba kamo makamata, akong igsoon? O, nagapabuta ba Kini kaninyo? Isalibay ba Kini ninyo ug tawgon Kini nga mini nga propesiya? Sa diha, Kini gipamatud-an na mismo sa inyong atubangan, pinaagi sa kalibutan, pinaagi sa panahon, pinaagi sa katawhan, ug pinaagi sa Espiritu Santo nga Kinsa maoy nagsulat Niini. Kini gipamatud-an na, sa tanan nga kinaiyanhon, espirituhanon, lawasnon. Ang tanang butang nga Iyang giingon nangatuman ug gipamatud-an.

<sup>75</sup> Ang Israel diha na sa iyang yuta; gidala sila paingon didto, gitapok sila pasulod didto, sama sa carnero. Ang mga lubo migukod kaniya ug gipabalik sila alang sa kasigurohan, ngadto sa ilang kaugalingong yuta. Hinumdumi, ang Israel gikasaaran nga mapanalanginan lamang samtang siya anaa sa iyang yuta. Ang Dios dili gayud nagapanalangin sa Israel sa gawas sa maong yuta. Si Abraham migawas sa yuta, gisilotan. Ang matag usa nga mibiya sa yuta gisilotan. Ang Dios makahimo lamang sa pagpanalangin sa Israel kung siya magapabilin sa iyang yutang natawhan, ug siya atua na karon ingon nga usa ka nasud. Ug ang Iglesia gitawag; siya nagapaabot na lamang alang sa Paglalin, sa pagkuha sa Pangasaw-onon.

<sup>76</sup> Ang mga Timri nabuksan na. Kini Gipadayag na kanato. Atong nakita kung unsay ilang gipamiyaan. Kamo nga gustong makiglantugi ug magbiaybiay mahitungod sa kaliwat sa serpente, ug sa bautismo sa tubig, ug uban pa, gibutahan kamo ug wala mahibalo niini. Ang dios niining kalibutana nagbuta kaninyo, sa Niini, ug wala kamo mahibalo niini. Maoy diay nga

anaay akong in'anang panahon karong buntaga, nagapakigbisog niining mga babag!

<sup>77</sup> Aron ang ilang mga propeta mapadayag sa niining katapusang adlaw; dili makahimo niini, ngadto sa mga Trumpeta, sa fiesta sa maong mga Trumpeta.

<sup>78</sup> Siya miingon, pinaagi kang Oseas, "Akong gisapsap." Karon bantayi, ang Israel maoy Iyang gihisgotan. "Akong gisapsap," o sa laing mga pinulongan, "Akong gitadtad, gitadtad sila, pinaagi sa mga propeta." Ingon niana ang ginabuhat sa Dios sa Iyang katawhan. Iyang gisapsap sila gikan sa ubang mga kanasuran. Sa unsang paagi? Sa Iyang Espada nga duhay sulab, ang Iyang Pulong. Iyang gisapsap sila, ang Iyang nasud, gikan sa mga kanasuran. Iyang gisapsap ang Iyang nasud gikan sa mga kanasuran, pinaagi'g mga propeta, ang Iyang gipamatud-an nga Pulong.

Sa ingon Iyang gisapsap ang Iyang Pangasaw-onon gikan sa mga denominasyon, pinaagi sa Iyang Pulong; nga gisaad pinaagi sa Malaquias 4, sa katapusang adlaw. Gisapsap ang Iyang Pangasaw-onon, gisapsap siya gikan sa ubang mga kasibahanan! Gisapsap ang Iyang Pangasaw-onon!

<sup>79</sup> Iyang gisapsap, ang Iyang mga propeta; tadlas, pinaagi sa Iyang mga propeta, pinaagi sa Pulong nagasapsap sa Israel. "Ipalain ang inyong kaugalingon gikan kanila."

Tan-awa sa dihang sila gusto mobuhat sama sa uban kanila. Sila miduol sa maong propeta, kang Samuel. Siya miingon, "Sukad mikuha ba ako sa inyong salapi? Aduna ba akoy bisag unsang gisulti kaninyo, sa Ngalan sa Ginoo, gawas sa kung unsay nahitabo?"

Sila miingon, "Wala, kana, kana maoy tinuod, apan sa gihapon gusto namo ang usa ka hari."

<sup>80</sup> Mao kana ang gibuhat sa mga kaiglesiahan. "Oh, kami nagtoo sa Pulong. Maayo kini, apan, nahibalo kamo, sila nag-ingon nga amo kinahanglan buhaton *kini*." Dili ko igsapayan kung unsay ilang giingon. Ang Pulong maoy husto!

Nagapaabot. Iyang gisapsap sila, pinaagi sa mga propeta.

<sup>81</sup> Unsa nang taknaa kini, igsoon? Unsa nang taknaa kini, ministro? Inyo bang nakita ang takna sa maong adlaw, ug ang ilhanan diin kamo nagpuyo? Inyo bang masabtan kini? Inyo bang nakita kini?

<sup>82</sup> Bisan hain karon, wala nay rebaybal. Ang matag-usa nagamulo, ang mga ministro nagahilak. Ako nagbasa sa usa sa-sa inilang mantalaan nga nagaabot dinhi sa simbahan, usa ka maayo kaayong mantalaan. Ug nakaila ako sa editor, ug kaila nako sila. Ug sila mga tawong diosnon, maayo kaayo, si Igsoong lalaki ug Babaye'ng Moore, sa *Herald of His Coming*. Usa sa labing maayong mantalaan sa kalihokan, ang *Herald of His*

*Coming.* Apan ilang gikalisud ang pagmantala sa bisan unsang butang gawas kung kini mahitungod sa, “Pagpuasa, pag-ampo! Pagpuasa, pag-ampo! Ipatingog ang Trumpeta! Kuhaa . . .” Pila man ang nagabasa niini? Nahibalo na kamo. Inyong makita kini sa kanunay, “Pagpuasa, pag-ampo! Pagpuasa, pag-ampo!” Mao lamang kini ang imong madungog. “Pagpuasa, pag-ampo! Kita magkaadunay usa ka dakung pagbanagbanag sa adlaw! Anaay usa ka dakung butang nga mahitabo! Kamong tanan, pag-ampo, pag-ampo, pag-ampo! Kita dili pa ulahi kaayo!”

<sup>83</sup> Nganong ginabuhat man kana nila? Nganong ginabuhat man kana nila? Gusto nila ang usa ka dakung pagkapukaw. Sila nanagpanghilak, nagatoo nga magkaadunay pagkapukaw. Mga maayong tawo sila. Ngano man kini? Unsa may ilang nabuhat? Wala nila naila ang pagkapukaw sa Pangasaw-onon. Kita n’yo? Pinaagi sa pagka Cristohanon, ilang gibati ang pagdani sa takna, apan wala nila naila kung unsa nay nahitabo. Mao kana ang nakapahimo kanilang mobati nianang kahimtanga. Ilang nahibalon nga adunay butang nga angay mahitabo, apan, kita n’yo, ilang ginalantaw kini sa umalabot pa, nga taliabot, sa dihang kini nahitabo na mismo sa inyong atubangan.

<sup>84</sup> Mao ra kana sa gihapong butanga ang ilang gibuhat sa karaang mga adlaw. Sila nagatoo sa umaabot nga Mesiyas. Sila nagtoo nga adunay moabot nga magauna. Apan diha na kini sa ilang taliwala, ug wala nila kini hiilhi. Wala nila kini maila. Nagtoo sila nga adunay moabot nga magauna nga maoy mouna sa Mesiyas, ug ilang gipunggot ang iyang ulo. Ug gipatay ang ilang Mesiyas, tungud kay gipanagna na kadto nga pagabutahan sila. Maoy sulti ni Oseas.

<sup>85</sup> Ug mao ra sa gihapon nga Espiritu, nga misulti pinaagi kang Oseas, misulti pinaagi kang Juan ug miingon nga ang iglesia sa katapusang mga adlaw mahimong “hubo, ug buta, ug mopalagpot Kaniya sa gawas sa iglesia.” Ilang napakyas ang pagpakakita niadtong mga panagna nga nangatuman na. Apan, maingon nga diha na kini, ilang naila nga adunay usa ka butang nga kinahanglan mahitabo. Wala lang nila kini makuha. Wala kini nila maila. Susama gayud sa mga Judio sa karaang mga panahon; gibutahan nga Laodicea; bahandianon, teolohiya, masukihon sa Iglesia, masupilon bahin sa Mensahe. Tan-awa kung unsa ka masupakon niadtong mga Judio kang Juan. Tan-awa kung unsa ang ka masupakon nila batok kang Jesus, sa dihang Siya maoy Bugtong nga ilang giangkon nga ilang gipaabot.

[Ang mga kagamitan sa pagpalanog miugong—Ed.] Sa akong pagtoo mibuto ang piyus. Tingali kana nagputol sa mga teyp rekorder, usab. Wala diay. Maayo.

<sup>86</sup> Sila mabatokon ngadto sa Mensahe.

Unsay nagakahitabo, mao ang kakusog sa kalihokan; ang matag usa kaninyong tanan mga gamit pampainit. Walay paagi aron ang iglesia magpabilin nga normal diha niana, sa nianang mga panahona. Tungud kay, inyong makita, nga ang matag usa kaninyo mga kasiyama'g walo ka BTU's, sa kasagaran. Ug kamo wala lang naglingkod diha sama niana; kamo sa kanunay nagapagawas og kainit. Adunay igong hangin dinhi sa sulod aron sa pagpabugnaw niining dapita. Apan, pinaagi niining mga gamit pampainit nga ania karon, dili mo-mo kini mahimo.

<sup>87</sup> Matikdi, mabatokon! Apan, karon, sama sa mga Judio kaniadto, gibutahan! Sila anaa sa Laodicea. Sila mao "hubo, makalulooy, alaut, ug wala mahibalo niini." Adlaw sa kabahandianon, dagkung mga teolohikanhong mga pagpanudlo, bantugang edukasyon, ug karon sila nangahimo na mga kaaway sa Mensahe. Sila walay pagpangpasilabot Niini, managsama ra kaniadto sa mga adlaw sa dihang si Jesus nga taga-Nazaret dinhi pa sa yuta.

<sup>88</sup> Ang hinungdan nga ang mga tawo, sa adlaw ni Noe, wala mosulod sa arka, tungud kay wala gayud nila ilha ang mensahe ni ang mensahero. Mao kana ang bugtong hinungdan nga sila nangalaglag, tungud kay dili nila giila ang takna nga diha sila niana nagkinabuhi. Dili nila giila nga hukman sa Diyos ang sala maingon sa Iyang gisaad nga Iyang pagabuhaton. "Iyang laglagon ang tawo, gikan sa nawong sa yuta." Iyang gitagna na kini. Siya tinuod sa Iyang gisulti. Ug Siya sa gihapon karon tinuod niini nga sama ra sa Iyang gibuhat kaniadto.

<sup>89</sup> Apan ang katawhan, inay nga modapig ngadto kang Noe, siya giisip hinoon nga tawong kasalikwaut. Sila wala nagtoo kaniya nga usa ka propeta. Nahibalo kamo, si Jesus, Siya sa Iyang Kaugalingon, nagsugilon kanato kung giunsa nila ang pagbugalbugal sa mga adlaw ni Noe, mibiaybiay kaniya, nagtawag kaniya nga panatiko ug kung unsa pa. Apan wala nila ilha ang ilang takna. Wala nila ilha ang adlaw. Wala nila ilha ang ilhanan. Wala nila ilha ang mensahe. Wala nila ilha ang mensahero, hinonao gihimong kalingawan sa ilang taliwala ug mibiaybiay kaniya. Si Jesus nag-ingon, "Maingon sa nahitabu kaniadto sa mga adlaw ni Noe!"

<sup>90</sup> Dinuyogon sa Israel nga anaa na sa iyang nasud, ug ang matag butang napahimutang na karon, ug ang Mensahe sa hingpit mipadayon sa pagkaylap, unsang adlaw na ang atong gipuy-an, igsoon? Hain na ba kita karon?

<sup>91</sup> Wala nila mahibalo-i ang adlaw. Wala nila mahibalo-i. Mao kana ang hinungdan nga ilang napakyas kini, tungud kay wala nila kini ilha. Sila kaniadto sama ra sa panahon, mao ra gayud sama sa katawhan karon, gibutahan pinaagi sa syensyang pangatarungan, pinaagi sa pamaagi sa edukasyon, pinaagi sa teolohikanhong mga seminaryo. Ug sa mga butang nga nagbuta

kanila niadtong adlaw, kini nahimo ang sama rang butang karon. Kini nagbuta kanila, usab.

<sup>92</sup> Ug, usab, ang kayano, ang kayano sa maong mensahe ug sa mensahero! Si Noe dili syentificanhon. Siya dili usa ka tawong edukado. Siya usa ka kabus nga mag-uuma, mapaubsanon, nga may yanong mensahe. Kato yano kaayo alang sa ilang hataas nga kinaadman.

Maingon usab kini karon! Ang Dios sa kanunay nagahimo niini sa yano, aron pagkuha sa katawhan nga motoo ug mosalig Kaniya. Kini usa ka lahi, lahi gayud nga Mensahe, apan mao ra nga Dios. Karon but ko'ng toohan ninyo Kini ug sabton nga ang Dios maoy nagsulti Niini.

<sup>93</sup> Si Jesus nag-ingon nga ilang gibugalbugalan ang Iyang propeta, si Noe. Ug maingon nga mibugalbugal sila niadtong adlaw, sa ingon ilang pagabuhaton kini pag-usab sa Iyang Pagbalik. Ilang pagabuhaton ang samang butang.

Mao kadto ang hinungdan nga si Faraon nalumos sa dagat. Wala gayud niya hiilhi ang iyang adlaw. Wala gayud niya hiilhi kung unsay nagakahitabo. Siya puno kaayo diha sa iyang mga kalamposan sa iyang syentificanhong panahon, sa pagtukod sa mga ciudad pinaagi sa kahago sa ulipon. Siya nalabian sa iyang-siya nalabian sa iyang pagkapuliki, sa pag-ila sa kahigayonan nga atua kaniya, ug iyang gipalayas ang mensaherong-propeta sa Dios ngadto sa kamingawan. Wala niya kini hiilhi. Mao kadto ang hinungdan nga ang mga butang mipadayon sumala sa mga nanghitabo. Wala gayud niya kini maila. Kon iya pa lamang naila ang gisaad nga Pulong sa Dios, alang niadtong mga katawhan!

<sup>94</sup> Ug kung ang mga kaiglesiahanan karon moila lang unta, kung ang mga kasimbahanan moila pa lang unta sa Pulong sa Dios nga naghimo niining saad alang niining takna, ngadto sa katawhan, sila dili mangalaglag.

Kung ang America maila lamang ang batakang balaod nga iyang gimugna, iyang dili unta gitugot ang pagkuha sa mga Biblia pagawas sa mga tulonghaan, pagtangtang sa Ngalan sa Dios sa mga salapi, ug nanumpa ubos sa Dios. Apan siya wala nagaila niini. Ngano man? Siya buta, hubo. Siya dili makaila sa dugo niadtong mga hamiling lalaki nga nangamatay diha sa mga panggubatan alang niining maong prebilihio. Sila nahikalimtan na; Sila mga abog na.

<sup>95</sup> Apan anaay Usa nga Kinsa nagahinumdom sa pag-ula sa dugo sa mga propeta, ang bili nga gikinahanglan aron madala kining Maayong Balita kanato karon. Kon giunsa ang mga linibo gipangkaon sa mga leon, ug gipangtambog ngadto sa mga langob, gipanggabas, gipangsunog, gipanglansang! Ang Dios nagaila niini.

Ang iglesia nakalimot na sa ilang mga propeta. Sila “wala na nagkinahanglan kanila,” maoy ilang giingon. Apan ang

Dios nahibalo nga Iyang gikinahanglan sila; Iyang ginasapsap ang Iyang mga katawhan pinaagi sa Iyang Pulong. Apan kini kinaraan na kaayo alang kanila sa niining adlaw. Wala Kini nila hiilhi. Mao kana ang hinungdan nga anaa sila nianang ilang kahintang karon. Mao kana ang hinungdan nga sila “hubo, makalolooy, buta, alaut, ug wala mahibalo niini,” tungud kay wala nila ilha ang takna nga atong gipuy-an. Wala nila kini himatikdi.

<sup>96</sup> Si Moises, iyang naila ang iyang adlaw ug ang iyang pagkatinawag, sa dihang iyang nakita ang saad sa Pulong sa Dios alang niadtong adlaw nga gipamatud-an. Iyang nahibaloan dayon, ug nailhan kung unsa siya ug kung unsay iyang angay pagabuhaton, pinaagi sa gisaad nga Pulong. Busa siya wala malisang kung unsay ikasulti ni bisan kinsa. Wala niya ikaulaw ang iyang mensahe, bisan kung ang tanang sacerdote ug tanang faraon, ang tanan na, ang tanang kagamhanan, misupak kaniya. Apan iyang giila sa dihang iyang nakita ang katong Kahayag, katong Haligi nga Kalayo nga nagapabilin niadtong sampinit, ug misulti kaniya sa Pulong nga maoy gisaad alang niadtong adlaw, ug miingon, “Gitawag ko ikaw aron moadto ug himoon kini.” Wala niya kalisangi ang-ang mga dagkung bahad sa hari. Siya milugsong aron dalhon ang mga katawhan sa usa ka pagpagawas, maingon sa Pulong sa Dios nga gisaad.

<sup>97</sup> Sa nakita nga ang saad gipamatud-an, iyang giandam ang katawhan alang sa ilang pagbiya. Kanus-a? Sa dihang iyang nakita ang saad sa Dios nga gipamatud-an. Hinumdumi, siya naggawi pinaagi sa iyang teolohiya; siya naggawi pinaagi sa iyang natun-an. Apan sa diha iyang nakita ang Pulong sa Dios nga gikapadayag, iyang nakita Kini nga gipamatud-an, “AKO MAO MAN AKO,” unya siya wala na magtagad kung unsay gisulti ni bisan kinsa. Siya wala malisang kung unsay pagabuhaton ni Faraon kaniya. Wala siya malisang kung unsay buhaton sa uban pa kanila. Ang Dios lamang maoy iyang gikahadlok, nga tingali’g dili niya hisabtan ang Dios, o sa ubang paagi nga dili niya hisabtan ang Dios. Wala niya kahadloki ang mga katawhan ug kung unsay ilang igasulti o unsay ilang buhaton. Ang Dios lamang maoy iyang gikahadlok, human niya maila nga kadto mao ang Pulong sa Dios.

<sup>98</sup> Siya dili makasabot kung nganong ang usa ka tawo nga sama kaniya igapadala didto. Apan sa dihang iyang naila, pinaagi sa gipaluyohan nga Pulong, kung unsa kadto, dayon wala na niya kahadloki ang mga sugo sa hari. Kung inyo lamang ilhon, kung kita karon makaila lamang! Si Moises miila niini sa dihang iyang nakita ang Pulong nga gipaluyohan, nakita nga ang pagpaluyo gipamatud-an, Siya andam na sa pagpagawas sa mga katawhan.

Si Job wala gayud nakaila nga kadto Dios. Hangtud ang yawa makahimo-makahimo nga patoohon ka usahay nga ang gagmay'ng mga pagsulay nga imong ginaagian maoy nga-nga ang Dios tingali . . . nagakastigo kanimo! Ang Dios kadto nga nagapakita kaniya'g usa ka butang. Wala gayud ni Job hiilhi kini hangtud nga nakita niya ang usa ka panan-awon. Sama kang Moises; sa dihang nakita ni Moises ang panan-awon, ang Haligi nga Kalayo diha sa sampinit, kadto gipaluyohan. Ug sa dihang . . .

Si Job, diha sa iyang pangutana, “Kung ang tawo mamatay, mabuhi pa ba siya pag-usab? Akong nakita ang kahoy nga namatay, ug nabuhi kini pag-usab. Akong nakita ang bulak nga namatay, ug nabuhi kini pag-usab.” Mao kadto ang iyang pangutana. “Apan ang tawo nga mamatay, mitugyan sa iyang gininhawa, siya igalubong. Ang iyang mga anak nga lalaki moduol aron magminatay, ug dili kini niya matiman-an. Oh, nga tagoan Mo ako sa lubnganan hangtud nga ang Imong kapungot mohupas!” Siya wala makasabot kung nganong mamatay man ang bulak ug mabuhi pag-usab, nganong ang dahon matagak man gikan sa kahoy, paubos, ug mopahimutang sa yuta, ug mobalik pag-usab sa tingpamulak. Siya miingon, “Ang tawo mamatay, ug hain man siya paingon? Ako nagtoo sa Dios; apan unsa may nagakahitabo sa usa ka tawo?”

<sup>99</sup> Apan usa niana ka adlaw ang kilat misugod pagpangidlap, ang mga dalogdog misugod sa pangulob, ang Espiritu mikunsad diha sa propeta. Ug iyang nakita ang pag-abot sa Tawo ni Kinsa makahimo pagbutang sa Iyang kamot diha sa usa ka tawong makasasala, ug sa balaang Dios, ug sumpayon ang dalan. Dayon misinggit siya, “Ako nasayud nga ang akong Manunubos buhi! Bisan pa kung ang mga ulod sa panit molaglag niining lawasa, sa gihapon dinhi sa akong unod akong makita ang Dios!” Iyang naila kung unsa ang pagkabanhaw.

<sup>100</sup> Si Balaam wala gayud makaila sa Manolunda hangtud nga ang mula misulti'g mga dila. Dili maila ni Balaam nga ang Manolunda nagatindog diha sa iyang dalan. Ang gibutahan nga magwawali dili makaila nga kadto Dios ang nagatindog diha sa dalan, nga mibabag kaniya sa pagbaligya sa iyang hiyas tungud sa salapi. Ug sa diha ang mula misulti diha sa tawhanong tingog, dayon naila ni Balaam nga kadto mao ang Manolunda nagatindog diha sa iyang dalan, nga nagababag kaniya sa pagbuhat kung unsay iyang ginabuhat.

<sup>101</sup> Oh, kamong mga gibutahan nga mga denominasyon! Kung ang Dios makahimo sa paggamit sa usa ka mula, nga amang, sa pagsulti sa pinulongan nga wala niya mahibalo-i, aron ipadayag ngadto sa usa ka ministro nga siya misimang na sa iyang dalan, dili ba Siya makagamit sa usa ka tawo aron pagbuhat sa samang butang? Mga katawhan nga gibutahan!



102 Kung si Ahab naila pa lamang ang iyang adlaw, dili unta niya gayud gisalikway ang propeta, si Miquias, uban sa Pulong sa Dios nga gisaad kaniya.

103 Sa dihang si Ahab nagtindog didto niadtong adlaw, siya ug-ug si Josafat. Ug sa dihang anaay na ilang upat ka gatus ka mga propeta didto nga nagapanagna, naga-ingon, “Lakaw! Mahimong maayo ang tanang butang. Ahab, ikaw nagapuyo sa kasal-anan. Gibuhat mo kami nga dakung denominasyon! Kami mga bantugang katawhan. Kami usa ka nabantug nga ministryo. Ania kami, kami upat ka gatus nga mga binansay nga mga sacerdote, o mga propeta. Kami upat ka gatus, nga binansay diha sa Pulong ug sa teolohiya. Nahibalo kami bahin Niining tanan.”

104 Busa, karon, kini nagpamatuod nga sila wala nahibalo sa tanan bahin Niini. Ang tawo nga ilang gitawag nga usa ka tawong buang, diha sa atubangan sa ilang kaliwatan, si Elias, ang matuod nga propeta sa Dios, nanagna, “MAO KINI ANG GIINGON SA GINOO, ‘Ang mga iro magatilap sa imong dugo, Ahab!’” Kita n’yo?

105 Apan kadtong mga sacerdote, mga propetang gipili sa tawo, nagdahum nga ila na Kini tanan natarung sa husto gayud. Sila miingon, “Amahang Abraham. . .o, Amahang Ahab, tumungas ka! Ang Ginoo magauban kanimo. Anaa kanimo ang Kasulatan, tungud kay gihatag sa Dios kining maong yuta sa Israel. Kini nahisakop sa Israel. Lakaw ka! Ang Ginoo magauban kanimo.” Oh, sus!

106 Apan, nahibalo kamo, si Josafat, ang usa nga walay kalambigitan diha sa sala sama kang Ahab, iyang nakita ang mga butang nga may gamay’ng kalainan. Siya miingon, “Wala na bay lain pang usa?”

107 Siya miingon, “Aduna pay among usa dinhi, apan akong gikaligotgotan siya.” Kita n’yo? Unsa may ginabuhat sa Dios? Ginasapsap ang Iyang mga katawhan, pinaagi sa usa ka propeta, usab. “Ako gikaligotgotan siya. Wala siyay laing gibuhat kondili ang pagsaway na lang kanako sa kanunay. Ug ikaw nahibalo nga ako usa ka tawong bantugan. Wala ko unta gitukod kining seminaryo dinhi kung dili pa ako usa ka dakung magtotoo. Aniay akong maayong pagkabansay’ng mga tawo. Ako silang gipahimutang didto uban sa mga basahon ug mga Biblia, ug tanan pang mga butang, aron itudlo kini. Ug ako nahibalo nga bantugan sila nga tawo.”

Apan kung naila pa lang unta ni Ahab kung kinsa kadtong tawhana, kadtong kabus timawa nga tawo kung tan-awon, ang anak nga lalaki ni Imla, nga nagatindog didto, nagasulti kaniya, “MAO KINI ANG GIINGON SA GINOO,” dili gayud unta niya nabuhat kadtong makamatay nga sayup nga iyang nabuhat. Apan iyang gisalikway si Miquias. Wala gayud niya. . .

Oh, mga katawhan, ilha ang panahon nga niini nanagpuyo kamo! Tan-awa kung unsay nahitabo. Tan-awa kung unsay gisaad. Ilha ang adlaw nga inyong gikinabuhian.

<sup>108</sup> Kung ang iglesiang denominasyon karon makaila pa unta nganong gipanaghukman sila, ug ang ilang mga sakop nanagpamiya na gikan kanila, sama sa Israel nga migula sa Egipto! Kung ang mga denominasyon mohunong pa lang unta sa pagpasipala niadtong mga teyp, ug magapaminaw ngadto kanila! Ug ikaw, magwawali, nga nagapaminaw niining teyp, maminaw ka! Kung ilhon mo lang unta ang takna nga imong ginapuy-an, kung imo lang unta ilhon ang ilhanan sa panahon, imong makita kung nganong ang katawhan nanagpangalagiw gikan niining mga denominasyon. Ang Espiritu sa Ginoo, nagapanawag! “Walay si bisan kinsa nga maka-ari Kanako,” matud ni Jesus, “gawas lamang kon siya pagadanihon sa Akong Amahan. Ug ang tanan nga anaa sa Amahan, sa milabay nga mga panahon, nga gitugyan Kanako, maga-ari.”

<sup>109</sup> Sama niadtong babayeng kabus sa atabay, ug ang sacerdote, daku kaayo ang ilang kalainan! Ang sinulat sa kamot anaa na sa bongbong karon, usab. Ilang nakita kini, apan wala nila kini ginaila.

<sup>110</sup> Kung ang mga Judio lamang giila ang gisaad nga ilhanan sa ilang Mesiyas, sumala sa ilang katapusang propeta! Ang Malaquias 3 nag-ingon, “Ania karon, Ako nagapadala sa Akong sinugo sa Akong atubangan, ug maoy maga-andam sa dalan.” Ug ilang giingon nga sila nagapaabot Kaniya.

<sup>111</sup> Daw sa unsa-daw sa unsa ka pagkatukma gayud hangtud sa-sa karon! Sila naga-ingon nga sila nagapaabot sa usa ka butang nga mahitabo. Ang mga tanang kaiglesiahan nanag-ampo ug nanagpuasa, ug naga-ingon, “Karon mag-ampo kita. Maghiusa kita. Atong gikinahanglan ang usa ka dakung butang nga mahitabo. Kita nahibalo nga anaay usa ka dakung butang nga mahitabo. Ang Iglesia kinahanglan nga mamahimong andam.” Mao kana kon usa ang tumong sa ilang pag-ampo.

<sup>112</sup> Mao kana kon unsa ang ilang ginaampo kaniadto. Ug didto miabot si Juan Bautista. Tungud kay, iyang gisalikway ang ilang mga seminaryo, tungud kay iyang gibuhat ang supak sa unsay gitudlo sa ilang mga amahan. Siya migula gikan sa kamingawan nga walay edukasyon. Mitungha siya nga dili pinatikig ang iyang kwelyo, maingon sa maoy tawag niini karon. Siya migula nga walay usa ka hugpong sa teolohiya. Apan siya miabot, nakahibalo pinaagi sa saad sa Dios nga siya maoy magpahibalo sa Mesiyas.

Siya miingon, “Anaa na Siya karon nagatindog sa inyong taliwala.” Ug sila naghunahuna nga siya buang, tungud kay siya dili man nagagikan sa ilang mga tulonghaan. Anaa na sa bongbong ang sinulat sa kamot, ug sila wala nahibalo niini. Ilang

giingon nga sila nagahulat sa maong Tawo nga moabot; ug Siya diha na mismo sa ilang taliwala. Ug wala nila Siya naila, bisan pa sila nag-ingon nga sila nagapaabot Kaniya.

<sup>113</sup> Managsama lamang, maingon sa mga Judio, sa kahimtang nga atua sila, maingon man usab ang mga Gentil, kay kini gitagna nga managsama, managsamang butang. Nag-ingon nga sila nagapaabot Kaniya. Apan ang mga denominasyon karon diha sa Gentil, ang kapanahonan sa Laodicea buta sama kaniadto kanila, tungud kay (ngano?) kini gipanagna nga maingon sila niana. Kini kinahanglan nga mahitabo.

<sup>114</sup> Kung ang Israel nahimong maila lamang ang ilang ilhanan, ila unta nahibaloan nga ang panahon sa pagtungha sa Mesiya nagkahaduol na. Kung ila pang naila!

Nahibalo kamo, ang-ang mga tinun-an gipangutana kana kang Jesus. “Nganong nag-ingon man ang mga escriba, nga, ‘Si Elias mouna pag-abot?’”

<sup>115</sup> Ug si Jesus mitubag, “Si Elias nahianhi na, ug wala sila makaila kaniya. Nahianhi na siya, ug gipatay na nila siya. Ilang gibuhat ang tukma sa unsay giingon sa Kasulatan nga ilang pagabuhaton.”

<sup>116</sup> Kung ila lang unta naila, nga kadtong “fanatico” nga maoy nagsaway sa matag hinipokritong mga butang nga ilang gibuhat, nga nagsaway sa matag butang nga ilang gibuhat. . . Siya miingon, “Kamong mga maut! Ayaw pagsugod pag. . . Mga bitin sa kasagbotan, kamong mga kaliwat sa mga bitin, kinsa may nagpasidaan kaninyo sa pagkalagiw gikan sa kapungot nga umaabot? Ayaw pagsugod paghunahuna sa inyong kaugalingon, nga ‘Si Abraham among amahan. Kami adunay *niini*, *niana*, o *uban pa*.’ Tungud kay sultihan ko kamo, ang Dios makahimo niining mga bato pagpatindog og mga anak alang kang Abraham.”

<sup>117</sup> Ayaw pagsugod paghunahuna nga kamo adunay World Council diha sa inyong kamot, ug anaa kaninyo ang labing maayong binistihan nga mga sakop. Ang Dios makahimo sa mga ilaga sa kadalanan sa pagpatindog og mga anak aron pagtuman sa Iyang Pulong; mga bigaon, mga naglibudsuroy, mga palahubog, mga sugarol. Makahimo Siya sa pagbuhat niini. Siya Dios sa gihapon.

<sup>118</sup> Mga gibutahang denominasyon, sama sa nabutahang Israel, parehong gipanagna nga maingon niana. Akong ginapakita kaninyo ang managsama, hangtud nga mosangko ako dinhi niining dapit nga akong gitinguha karon. Gibutahan, sama sa mga denominasyon sa mga Gentil sa Panahon sa Laodicea, gibutahan karon maingon kanila kaniadto.

<sup>119</sup> Ang Panahon sa Laodicea gitoohan nga angay makadawat sa usa ka Mensahe! Ang Malaquias 4 nag-ingon nga sila makadawat.

Apan unsay ilang ginapangita? “Ang among denominasyon makapatungha Niini. Kung kini dili magagikan pinaagi kanamo, sa Baptist, sa Presbyterian, sa-sa Assemblies, sa Oneness, anaay usa . . . kung kami dili magpatungha Niini, kini dili matuod.”

Mao rang butanga ang ilang gibuhat niadtong adlaw! Ug kini miabot ug mibiya na, ug wala nila mahibalo-i kini. Wala nila kini nailhan, bisan pa kini gituman ang matag Pulong. Si Jesus miingon, “Ilang gibuhat ang sumala sa nahisulat nga ilang pagabuhaton. Busa maoy ilang pagabuhaton sa Anak sa tawo,” Siya igasalikway.

<sup>120</sup> Karon matikdi, managsama karon diha sa mga adlaw sa Gentil, sumala sa gisaad nga Kasulatan sa Malaquias 4.

Diin, si Jesus miingon, “Ang tanang Kasulatan gilamdagan, ug walay bisan gamay Niini nga mapug-ngan sa katumanan.” Walay gayud paagi sa pagpugong sa Kasulatan gikan sa pagkatuman. Ang tanan kinahanglan matuman. Ug si Jesus miingon nga kini mahitabo. Ug ania karon atong nakita nga kini nahitabo na. Atong nakita kini.

<sup>121</sup> “Ipasig-uli” ang unsa, niining katapusang mga adlaw? Kamong mga kaigsoonang maka-denominasyon, paminaw! Ipasig-uli ang pentecostal, tiunay’ng fiesta. Sama Kini kanhi sa sinugdanan, maingon usab Kini maipasig-uli sa dili pa ang fiesta sa Trumpeta sa Israel patunggon. Kinahanglan nga mahipasig-uli! Kinahanglan adunay butang nga mohimo niini. Ang Malaquias 4 nag-ingon nga kini mopasig-uli pagbalik sa Pagtoo sa mga amahan, ngadto sa mga anak, kon unsa ang mahitabo.

<sup>122</sup> Kung ang Israel nakaila pa lang unta sa ilang Mesiyas, ang ilhanan nga gisaad, sila wala unta sa kahimtang nga diin sila anaa karon. Kung sila lamang. . . Apan nganong wala man kini nila nahimo? Makalulooy kini. Nganong wala kini nila mabuhat? Tungud kay ang Dios nag-ingon nga dili nila buhaton kini. Pila man ang nagatoo niana, moingon, “Amen.” [Ang congregasyon naga-ingon, “Amen!”—Ed.] Ang Dios nag-ingon nga dili kini nila buhaton.

Ug mao ra kini nga Dios ang nag-ingon, sa Panahon sa Iglesia sa Laodicea, kini mahitabo, ug ania na kini karon sa ilang atubangan. Unsaon may ilang mahimo kondili sa pagbuhat niini?

<sup>123</sup> Kon lamang ilang naila ang gisaad nga ilhanan sa Mesiyas, ang ilhanan sa Anak sa tawo! Siya nagaabot sa ngalan sa Anak sa tawo. Karon, Siya atua sa ngalan, tadlas sa Panahon sa Pentecostal, diha sa Espiritu Santo, Anak sa Dios. Karon, ang mosunod mao ang Milenyum, ang anak ni David. Tulo ka “pagka-Anak,” mao ra nga Dios. Mao ra, nga “Amahan, Anak, Espiritu Santo,” mao ra nga Dios. Anak ni David, Anak sa Dios. . . Ang Anak ni David, Anak sa tawo, Anak sa Dios, ang

mao ra nga Dios sa tanang panahon, diha lamang sa tulo ka nagkalainlaing buhatan.

<sup>124</sup> Maingon man ang “Amahan, Anak, ug Espiritu Santo” dili tulo ka mga Dios, kondili mao ra nga Dios diha sa tulo ka mga hugna, tulo ka mga buhatan, ingon nga Amahan, Anak, ug Espiritu Santo.

Apan, sama karon, gibutahan sa gikabilinbiling kalagdaan sama kanila kanhi, gibutahan sa gikabilinbiling kalagdaan, wala kini nila makita. Nganong dili man sila makakita niini? Dili gayud kini nila makita. Hinumdumi, kana MAO ANG GIINGON SA GINOO.

Moingon, “Nganong imo man ginasulti kini kon in-ana?”

Sama ra sa gibuhat ni Juan, sama ra sa gibuhat sa uban kanila. Anaay usa nga nagapabilin dinhi ug dinha, nga kinahanglan ipagawas. Oh, carnero sa Dios, patalinghugi ang Tingog sa Dios! “Ang Akong carnero nagapatalinghug sa Akong Tingog.”

<sup>125</sup> Ang babaye sa atabay nakaila sa iyang adlaw, pinaagi sa ilhanan sa Mesiyas. Siya atua sa dautan nga kahintang. Dili siya mouyon uban kanilang mga karaang kaiglesiahan, sa paagi nga ilang ginabuhat. Sila nagkinabuhi sa tanang matang, ug, mga butang nga ilang ginabuhat, siya dili mitoo nianang niadtong mga butang. Apan siya nahibalo nga adunay Usa nga umaabot sa usa ka adlaw. Ang kabus nga tawo didto, diha sa dalanon padulong sa atabay; iyang nakaplagan kadtong Butang nga iyang ginapangita, sa dihang Siya misugod sa pagpadayag kaniya ang tinago sa iyang kasingkasing, gitug-an kaniya ang sala nga iyang gikabuhian.

Ang babae miingon, “Sir, akong nasabot nga Ikaw usa ka Propeta.” Karon, sila wala pa gayud nakabaton og usa sa sulod sa upat ka gatus ka katuigan. Miingon, “Akong nasabot nga Ikaw usa ka Propeta. Ug ako nahibalo nga kung moabot na ang Mesiyas Iyang buhaton kining mga butanga.”

Siya mitubag, “Ako mao Siya.”

<sup>126</sup> Iyang nailhan. Wala nay pangutana pa, “Unsaon Mo man sa pagpamatuod niini?” Gipanghimatud-an nang daan kadto. “Kung mahiabot na ang Mesiyas, kini mao kon unsa ang Iyang pagabuhaton.”

Bueno, kung siya makaila man niini pinaagi sa mga Kasulatan, dili ba kita makaila sa mga Kahayag sa kagabhion ug ang ilhanan niining adlaw?

“Kami nahibalo kung mahiabot na ang Mesiyas Iyang ipakita kanamo kining tanang mga butanga. Iyang itug-an kini kanamo.”

Siya miingon, “Ako mao Siya nga nakigsulti kanimo.”

<sup>127</sup> Wala nay pangutana. Siya milakaw, ug iyang gisultihan ang mga katawhan, “Dali, tan-awa! Ania na Siya.” Wala nay pangutana alang kaniya. Napiho na kadto, tungud kay iyang naila ang adlaw nga iyang gipuy-an. Iyang naila kini.

<sup>128</sup> Maingon usab si Natanael, usa ka inilang Hebreohanon, sa dihang iyang nakita kadtong ilhanan sa Mesiyas nga gikasaad kaniadto; bisan pag unsang kadaghan ang mga sacerdote, bisa’g daghan pang uban.

Unsay gibuhath niini? Kini nakasamok sa mga sacerdote, sa pagkakita kanila nga mga katawhang nanagpamiya sa simbahan ug nanagkuyog. Miingon siya, “Kung ang si bisan kinsa kaninyo motambong sa Iyang tigum, mapalagpot gayud kamo. Kamo palagpoton dihadhi sa denominasyon.”

<sup>129</sup> Mao usab kini karon. “Kamo palagpoton namo sa among organisasyon kung motambong kamo sa iyang tigum.”

<sup>130</sup> Nahinumdoman ba ninyo ang tawong buta? Ang amahan ug inahan dili gani makahimo pagtubag; sila nangahadlok. Tungud kay, sila nag-ingon, “Si bisan kinsa nga moadto sa pagtan-aw kang Jesus, o-o mitambong sa Iyang mga tigum, sila palagpoton.” Apan, kadtong tawong buta makapanghimatuod sa iyang kaugalingon, siya nga kanhi usa ka buta karon makakita na.

<sup>131</sup> Ako, nga kanhi usa ka buta, makakita na karon. Ako, nga wala nahibalo niining mga butanga, kini gikapahibalo na kanako pinaagi sa Espiritu Santo. Buhi-i, mga denominasyon, tungud kay sila moanhi, bisan pa niana! “Kung Ako ikaisa na gikan sa yuta, Akong kabigon ang tanang katawhan ngari Kanako.”

<sup>132</sup> Si Natanael nakaila niini. Nahibalo siya niini.

<sup>133</sup> Maingon sa pagpanghimatuod ni Moises sa Kasulatan, ang gipaluyohan ng Pulong. Si Moises nahibalo nga kadto maoy saad alang niadtong adlaw, tungud kay kadto uyon sa Kasulatan, bisan unsang katalagsaon. Siya miingon, “Kinsa man nga akong masulti kanila... Akong suginlan sila nga akong nakita ang usa ka Kahayag dinhi likod sa kamingawan. Unsaon ko ang pagsugilon kanila karon nga dihay usa ka Kahayag sa likod dinhi, ug kining Kahayag nagsugo kanako sa paglugsong didto?”

Siya miingon, “Sa pagkatinuod, Moises, Ako magauban kanimo.” Ug dili lamang...

<sup>134</sup> Wala Niya ipakita ang Iyang kaugalingon didto sa Egipto; kondili pinaagi lamang sa mga milagro ug mga ilhanan. Apan sa Iya nang natigum silang tanan, Siya mipakita pag-usab kanila, ug gipaluyohan ang ministryo ni Moises sa atubangan sa mga Pinili ug mga tinawag-pagawas. Sa dihang gisapsap sila niadtong maong propeta gikan niadtong maong nasud ug

gidala sila ngadto sa usa ka dapit, dayon ang Haligi nga Kalayo mipakita na usab, ug didto sa ibabaw sa Bukid sa Sinai.

135 Imanagsama kini karon. Amen! Ang pagdayeg maiya sa Dios! Kini labaw pa sa kinabuhi alang kanako. Ug ang akong panahon misugod na sa pagkamang, ug akong nakita na ang takna sa kalaw-ayan ug ang kaulag mikuyanap sa kanasuran ug mga butang, ug dayon ako milingi ug mitan-aw kung unsay nahitabo. Ang akong kasingkasing nagalukso sa kalipay, sa pagkasayud nga human sa hamubong panahon kining yutan-ong payag nga puluy-anan matun-as na, apan ako adunay usa nga nagahulat didto. Ako nagapaningkamot pagbira sa katawhan, gasapsap kanila gikan niining mga butanga ug mga butang, aron sila pagawason; aron ipakita kanila, pinaagi sa mga Kasulatan, nga ang Dios nagatindog didto; inubanan sa pagpaluyo sa Haligi nga Kalayo, nga ginatus ug linibo ang nakakita, ug bisan pa gani Kini nakuhaan, kaniadto, pinaagi sa camera, sa matag panahon, aron pamatud-an kini.

136 Ang mga manunundog manungha. Sigurado, kinahanglan kini nga mahitabo. Ang mga manunundog nanungha sa adlaw ni Moises ug nagbuhat sa samang butang. Ang Dios miingon, “Ipalain ang imong kaugalingon, Moises. Ayaw pakig-uban kanila. Lamyon Ko sila.” Ug ang kalibutan milamoy kanila. Ug maingon man usab niini karon; nagabalik sa kalibutan, mga laraw sa salapi ug tanan na. Kita n’yo?

137 Ang ilhanan ni Moises nga sumala sa Kasulatan! Siya maosiya mao kadtong bantugan nga propeta sa Dios nga milugsong didto aron ipahigawas sila, ug ilang giila kini. Ilang giila ang ilhanan. Siya mao ang hingpit nga gisaad sa Kasulatan, gipamatud-an.

138 Si Jesus mao kadtong gisaad sa Kasulatan, gipanghimatud-an ngadto sa babaye. O, Siya mao ang Hubad. Si Jesus mao ang Hubad sa Kasulatan. Ang Iyang Kaugalingong Kinabuhi maoy minghubad sa Kasulatan.

139 Wala ba ninyo makita ang Mensahe sa panahon? Maila ba ninyo kung hain na kita? Ang Mensahe mismo, gikan sa Kasulatan, nagahubad kaninyo sa takna nga ania kita niini. Kini mao ang hubad.

140 Si Jesus miingon ngadto sa Israel, “Kung nahibaloan pa lang unta ninyo ang inyong adlaw.” Usa ka higayon, nga nagalingkod didto sa ibabaw sa Bungtod sa mga Olibo, Siya milantaw, miingon, “Jerusalem, O Jerusalem!” Siya mihilak. Milantaw Siya sa ubos. Iyang nakita.

Dili sa panag-ingnan, siguro, halayo. Sa miaging gabii, sa miaging buntag, hapit sa ikanapulo ang takna, sa dihang nakita ko kanang bigaon nga simbahan. Diha sa sulod sa imong kasing kasing, imong mabati ang Espiritu Santo nagapatulo sa luha.

“Jerusalem, O Jerusalem, sa makadaghang panahon nga gitipigan Ko ikaw. Apan unsay imong gibuhat? Imong gipatay ang mga propeta nga akong gipadala kanimo. Imong gipamatay sila.”

Ug ang mga Mensahe napadala na sa iglesia, karon, gipatay na pinaagi sa ilang denominasyong mga dogma. Ang Kasulatan gipatay na pinaagi sa ilang mga dogma. Si Jesus nag-ingon, “Kung nahibalo pa lang unta kamo sa inyong adlaw! Apan, halayo na kaayo kini karon, ulahi na kini kaayo karon.” Maingon usab niini sa mga kaiglesiahanan!

<sup>141</sup> Ako nagatoo, sa bug-os ko’ng kasingkasing, nga siya gilabyan na sa katubsanan. Bisan kung unsa pay inyong buut hunahunaon bahin niini, inyong kaugalingong panghunahuna lang kini. *Kini* maoy ako. Kita n’yo? Wala mo kinahanglana ang akong panghunahuna. Apan ako nagatoo nga gilabyan na siya sa katubsanan, ug miagi na, sulod sa miaging lima o unom ka tuig. Akong nahinumduman. Kamo nahinumdum sa Chicago. Bantayi kung unsay nahitabo sukad niadto, ug bantayi kini nga nagapadayon sa pagkahitabo. Kita n’yo? Hinumdumi, ang akong ngalan nag-una niini. Kini nagpabilin diha. Kini ang MAO KINI ANG GIINGON SA GINOO. Tan-awa kung wala siya nagkaunlod, sa padayon.

<sup>142</sup> Tan-awa niadtong 1933, kung giunsa niini ang pag-ingon sa pagabuhaton sa babaye niining katapusang mga adlaw. Kon giunsa niini pag-ingon sa katawhan. . . Kon unsa si Mussolini, kon unsa siya mahiabot sa iyang katapusan. Kon unsa si Hitler mahidangat sa katingalahang pagkatapus. Kon unsa ang tulo ka mga ismo mosangko sa komunismo. Kon unsa ang mga salakyanan motungha, nga sama sa itlog tan-awon. Ug kon unsa ang kababaye-an magasul-ob sa mga bisti nga sama sa lalaki ug lalaki na kung tan-awon, maingon ang ilang mga saput sa ilalum; ug mosangko sa katapusan sa pagtabon sa mga dahon sa higira, sama, diha kanila. Kon unsa ang mga maulagong buhat, kon unsaon nila sa pagbuhat niining adlaw. Tan-awa kung unsay ilang gibuhat. Ug anaa na kini sa inyong atubangan, dayon.

<sup>143</sup> Kung ang Cristohanong kababayen-an makahimo lamang. . . ang sa ngalan nga Cristohanong kababayen-an makaila lang unta, makaila nga ang espiritu sa kaulag nga anaa kanila iya sa yawa, aron ipaputol kanila ang ilang buhok. Ang yawa mao ray bugtong makahimo niana. Supak kana sa Pulong sa Dios alang kaninyo, sama lang kini kaniadto sa tanaman sa Eden. Unsa ang ilang gihimo? Kung ila lamang unta maila! Sila nagsulay pag-ingon, “Oh, kanang gamay’ng tigulang nga fanaticong magwawali, ang naga-ingon!” Kini dili ako. Ako wala naga-ingon kaninyo kon unsay buhaton. Igo lamang ako magkutlo sa Pulong. Kung maila pa lang unta nila nga kini mao ang yawa.



144 Gitawag nila ang ilang kaugalingon nga mga Cristohanon. Si Jesus nag-ingon, “Unsaon man ninyo pagtawag Kanako, ‘Ginoo,’ ug dili nagabuhat sa mga butang nga Akong gina-ingon buhaton?” Sila dili mahimong mga Cristohanon. Dili ako ang ilang maghuhukom, apan igo lamang ako magsulti kung unsay giingon sa Pulong. “Unsaon man ninyo ang pagtawag Kanako, ‘Ginoo,’ ug unya dili mobuhat sa mga butang nga Akong giingon nga buhaton?” Ug ang kinatibuk-ang Pulong dinhi mao ang pinadayag ni Jesus Cristo. “Unsaon man ninyo sa pagtawag Kanako, ‘Ginoo?’”

145 Kung maila pa lang unta nila nga kini mao ang yawa, ang usa ka espiritu sa kaulag. Ang pipila ka maayong kababayan-an didto . . .

146 Sa akong paghunahuna kini mao ang labing mangil-ad nga dapit nga akong nakita sukad sa akong kinabuhi, ang Jeffersonville, Indiana, tungud sa mga babayeng hubo. Ako nakaadto na sa Hollywood. Ako nakaabot na sa nagkalainlaing dapit. Nalibot ko na ang kalibutan, ug akong nakita ang tanang matang sa kahugawan. Akong nakita kini didto sa Paris. Akong nakita kini didto sa England, nga maoy kinalabwan sa tanan kanila.

147 Akong gitooan nga ang England mounlud sa kaulahiing adlaw sa ilalum sa dagat. Takus kini niini; ang kangil-aran, kahugawan, walay-pulus! Mao kana ang basurahan sa kahugaw sa kalibutanong kaulag, ang labing hiwi sa kasulatan, mga katawhang malimdanon nga akong nakita sukad sa akong kinabuhi. Siya naingon niana tungud kay iyang gisalikway ang Kamatuoran.

148 Si Billy Graham nag-ingon nga iyang kinahanglan ipagawas ang iyang asawa ngadto sa mga parke; mga butang pakighilawas nagapadayon tali sa mga kalalakin-an ug kababayan-an, mga batan-ong lalaki ug mga batan-ong babaye, didto mismo sa parke, sa dayag. Siya nahimong basurahan sa kahugawan; maingon man ang Francia, maingon man usab ang uban pa sa kalibutan. Ug maingon man usab ang Estados Unidos, nga nahimong lider nilang tanan!

149 Tan-awa karon. Nagpahimo kanila sa pagpapatol sa ilang buhok, nanagsul-ob ug mga purol, mga pantalon, nanabako, ug nanagtawag sa ilang kaugalingon nga mga magtotoo. Dili mo ba napamalandongan, igsoon, o babaye. . . Nagpasabot, pasayloa ko, dili ang akong igsoong babaye; mobuhat sa butang nga sama niana. Wala ba ninyo napamalandongan nga kini mao ang yawa? Apan unsay . . .

Sama sa mga Judio sa kanhing panahon, kamo dili motoo sa gipaluyohang Pulong sa dihang gipanghimatud-an na Kini kaninyo. Kamo nagpabilin gayud diha sa inyong denominasyon nga mga kalagdaan nga naga-ingon nga kini maayo lang.

Kamo nanaglitok sa nagkalainlaing dila, kamo naglukso-lukso, nanag-awit kamo diha sa espiritu, ug nagaputol sa inyong buhok. Mahuna-hunaan mo ba ang usa ka Cristohanon nagabuhat niana?

Ako nakakita na og mga yawa, nakakita ako og mga abat-mananambal, akong nakita sila nga nagsulti'g mga nagkalainlaing dila ug nanaghubad, ug naglukso-lukso ug misayaw diha sa espiritu; nanag-inum sa dugo diha sa bagolbagol sa tawo, ug nagtunglo sa Ngalan ni Jesus Cristo.

<sup>150</sup> Kamo moingon, “Ako sakop sa simbahan. Halleluia! Himaya sa Dios! Ako . . .” Ikaw nahisakop sa unsa?

Ang Iglesia mao ang Pulong! Ug ang Pulong naga-ingon, “Kini makauulaw alang kanimo ang pagbuhat niini.”

Kamong mga gibutahan nga pundok sa mga Fariseo, naga-agak kanilang mga kabus nga mga anak ngadto sa impiyerno sama niana; tungud kay kamo nahadlok nga mawala ang panginabuhian, ug kamo pagapalagpoton sa inyong denominasyon kung inyong sugdan ang usa ka butang bahin Niini. Maulaw ka, kamong hipukrito! Batoni ang kaulaw niini. Nga nakita na ang takna nagsingabot na sama niini, ug misimang kamo pinaagi sa inyong mga kalagdaan pahalayo sa Pulong sa Dios. Mapangahason kamo, mga binutahan!

<sup>151</sup> Dili ba nag-ingon ang Biblia nga kamo mga binutahan? Dili ba kamo makasabot niana nga kamo mga buta? Ang Biblia nag-ingon nga mga buta kamo. “Ug kamo mga hubo, makalooloy, talamayon, buta, ug wala mahibalo niini.” Kung naghunahuna kamo nga inyong naangkon ang labing dakung simbahan sa ciudad, ug inyong ginabuhat *kini, kana*, o ang *uban pa*; ug ang Biblia nag-ingon nga kamo kabus kaayo nga walay sama, ug kamo buta. Ug Siya sa gihapon nagpabiling nagatindog diha sa pultahan, naninguha sa pagbaligya kaninyo ug tambal sa mata; dili nga ibaligya kini kaninyo, kondili ihatag kini kaninyo, ug dili kamo modawat niini. Nagatuman sa Kasulatan.

<sup>152</sup> Unsa nang adlaw ang inyong ginapuy-an, mga katawhan? Inyo bang naila na ang takna, naila ba ang ilhanan?

<sup>153</sup> Sila lamang unta makapamalandong, silang mga kababayan-an, nga kana mao ang yawa. Kini mao ang mahilas nga yawa, sa ngalan sa relihiyon. Mao kana siya sa kanunay. Siya maingon-ingon sa matag propeta, siya maingon-ingon sa matag maalamon, siya maingon-ingon bisan pa kang Jesus Cristo, ingon nga tawong relihiyoso. Ug ang Biblia nag-ingon nga siya “kamaingon-ingon niining katapusang mga adlaw,” bisan pa ang mga Pentecostal, “ug pahisalaagon ang pinili,” pagawas nianang iglesia sa Pentecostal, “kung mahimo pa.” [Walay sulod sa teyp—Ed.]

<sup>154</sup> “Diyotay,” Siya nag-ingon, “tungud kay masigpit ang pultahan ug hiktin ang dalan, ug apan mahimong diyotay ra

ang makatultol niini. Kay maingon sa mga adlaw ni Noe, nga walo lamang ka mga kalag ang naluwas, maingon usab niini sa pag-abot sa Anak sa tawo.” Hunahunaa kini! Unsa nang adlaw ang atong gipuy-an? Naila mo na ba ang takna, naila mo na ba ang adlaw?

Nakuha ko na ang daghan ninyong panahon, apan anaa pay akong pipila ka mga gutlo. Kita n'yo?

<sup>155</sup> Nagapahimo kanila sa pagpapatul sa ilang buhok. Bueno, sila moingon, “Ang among simbahan dili nagatagad niana.” Nahibalo ba kamo kung ngano? Sila mga buta.

“Dili makadaut ang pagpapatul sa inyong buhok.” Ang Biblia nag-ingon nga makadaut kini! Mangil-ad man gani alang kaninyo ang pagpapatul sa inyong buhok ug ngani sa pag-ampo.

Kamo moingon, “Bueno, ang babaye kinahanglan nga adunay pandong.” Ug ang Biblia nag-ingon nga ang iyang “buhok” mao ang iyang pandong. Dili ang kalo; ang iyang buhok!

<sup>156</sup> Unsa kaha kung si Moises miingon, “Akong kuhaon ang akong kalo inay nga ang akong sapatos”? Dili kini magpulos. Ang Dios nag-ingon nga “sapatos,” ug sapatos maoy gipasabot sa Dios.

Siya nag-ingon “buhok,” dili kalo! Himaya sa Dios! Gusto Siya niana, nakasiguro ako. Sa Dios ang pagdayeg! Matinud-anon Siya sa unsay Iyang ginaingon. Ang Kasulatan dili mahubad sa kinaugalingon. Wala magpasabot nga alang lamang sa inyong denominasyon; nagpasabot Kini sumala lamang sa ginaingon Niini, ug Siya maoy maghuhubad.

<sup>157</sup> Moingon, “Adunay akong nahibaloan nga babaye nga nagabuhat niana.” Dili ko igsapayan kung unsay imong nahibaloan. Ako nahibalo kung unsay giingon sa Dios bahin niini. Ipasibo ang inyong kaugalingon.

<sup>158</sup> Kung ila pa lang unta naila kung unsa kini, gining. Uh! Kung imo lamang maila! O, “babaye,” dili gining.

<sup>159</sup> Akong nakita ang usa ka ilhanan, sa pagkagikan didto sa Blue Boar, didto sa, akong pagtoo sa Fifth Street didto, usa ka imnanan sa beer, nagkanayon, “Mga talad alang sa mga gining.” Ako mihunong gayud didto; matud ko, “Walay usa nga inyong makuha.” Ang usa ka gining dili gayud moanha nianang maong dapit. Tingalig ang babaye, apan dili ang usa ka gining.

<sup>160</sup> Namatikdan ba ninyo, ang pagkahugno sa kalibutan nagsugod diha sa kaulag sa usa ka babaye? Nahibalo ba kamo nga kini mosangko sa mao rang paagi, sa kaulag sa babaye? Ug ang iglesia, ginahulagway, pinaagi sa babaye? Ang iglesia maoy usa ka babaye, sa espirituhanong pagkasulti.

Maingon usab ang Pangasaw-onon usa ka babaye, sa espirituhanong pagkasulti.

<sup>161</sup> Ang kaulag sa iglesia, kon giunsa kini pagbuhat! Tan-awa ang mga panan-awon, tan-awa ang mga butang, tan-awa ang mga panan-awon bisan kadtong ginahatag sa Dios, ug kadtong panan-awon tinuod. Aniaiy akong Biblia sa akong kasingkasing, alang kaninyong mga katawhan diha sa teyp, ug ang tumatambong makakita niini. Akon nakita kana! Ang Makagagahum nga Dios nahibalo nga kana mao ang Kamatuoran. Wala ko nahibaloan kini kaniadto karon pa lamang. Anaa ra siya, “hubo, ug wala mahibalo niini.” Siya anaa pa gayud sa iyang sa pagmaya. Anaa ra siya.

Apan sa diha katong Pangasaw-onon gikapakita na, kato lahi ra kaayo. “Ang Alfa ug ang Omega!” Uh-huh.

<sup>162</sup> Ang yawa ang nagabuhat niini. Apan sama sa mga Judio kaniadto, sa dihang ilang nakita ang Pulong. . .

Ug si Jesus nag-ingon ngadto sa mga Iya, Iyang gisulti kini ngadto sa Iyang mga tinun-an, “Susiha ninyo ang mga Kasulatan. Kamo, nahibalo kamo, kamo naglibog bahin Kanako ug sa Akong buluhaton. Susiha ang mga Kasulatan. Diha Kanila naghunahuna man kamo nga pinaagi niini makabaton kamo ug Kinabuhing Dayon, ug Sila maoy nagpanghimatuod Kanako, Sila maoy magsugilon kaninyo kung unsay Akong Mensahe. Kung dili kamo makatoo Kanako, toohi ang maong mga Pulong nga ginahubad sa Dios diha kaninyo.”

<sup>163</sup> “Dili ta motugot nga kining Tawhana magmando kanato. Anaay atong kaugalingong mga sacerdote, ug uban pa.” ipadayon kon in-ana, kana tanan lamang ang masulti. Kini ulahi na kaayo, bisan unsaon. Ang mga pang-denominasyon nga kalagdaan nga naga-ingon nga kini maayo lang, sila nagpatalinghug niana. Ila pang palabihon pagpatalinghug. . . Inyong gitoohan ang-ang pulong sa-sa tawo labaw pa kay sa motoo kamo sa Pulong sa Dios. Sila dili nagaila. Ang mga kasimbahanan karon dili nagaila sa Ikaduhang Timoteo 3. Kung inyong. . .

<sup>164</sup> Akong nakita ang pipila kaninyo nga misulat sa mga Kasulatan. Karon, mao kini ang mga Kasulatan nga akong gikutlo gikan mismo dinhi. Diin, kung mahitabo nga adunay si bisan kinsa motawag sa akong pagtagad bahin niini, o ang akong kamot diha niini, mahimo kong ikapakita kanila ang Kasulatan alang niini. Kita n’yo?

<sup>165</sup> Sila wala nagaila sa Ikaduhang Timoteo 3, diin Kini nag-ingon, “Sa katapusang mga adlaw, gahig-ulo ang mga tawo, tigpagawal, mahigugmaon sa kalipayan inay sa Dios unta hinoon, mabudhion, tigbutangbutang, mapatuyangon, ug dili mahigugmaon sa maayo (sa Pangasaw-onon), kita n’yo; nga nagbaton sa dagway sa pagkadiosnon, apan nagapanghimakak sa Gahum niini; likayi ang ingon kanila. Kay mao kini ang matang nga magapanaka-saka sa kabalayan,

ug magapamihag sa mga mahuyang babaye, mga mahuyang babaye nga ginadaldal sa nagkalainlaing mga pangibog, dili gayud makakat-on o dili gayud makakab-ot sa kahibalo sa Kamatuoran.” Dili gayud! Dili sila makabuhat niini, ug sila dili mobuhat niini. Ang Dios maoy nag-ingon.

Ug, buta nga Fariseo, dili ba kini nimo makita? Wala ako masuko; ako lamang gidukdok ang lansang ug gipadulot kini. Bisan pa ang mga kasimbahanan wala nagaila Niini. Ang mga kababayen-an dili makasabot niini. Sila unta... Mga babayeng mahuyang, nga ginadaldal sa nagkalainlaing pangibog,” Hollywood, tanan niining matang sa butang, pugdol og buhok, nanagsul-ob sa mga purol, namintal sa mga nawong, tanan niining matang sa butang, nga dili na angayan. Nahibalo ba kamo nga ang kababayen-an adunay dakung papel niining katapusang mga adlaw?

<sup>166</sup> Nahibalo ba kamo nga ang Biblia nag-ingon, nga, “Kadtong nanagpakaiyas gikan niining dakung kalaglagan mamahimong matahum nga sanga sa atubangan sa Ginoo”? Sa umalabot nga adlaw akong mahisgotan kini, kung itugot sa Ginoo, alang niini, alang kaninyong mga kababayen-an. Igapakita kaninyo kung unsay gihunahuna sa Dios sa babaye nga sa tinud-anay nakaikyas niining maong kalaglagan niining adlaw. Matud pa, “Siya mahimong usa ka matahum.”

<sup>167</sup> Ako nakadungog og usa ka babaye, sa miaging adlaw, nga mikatawa sa... Usa ka batan-ong babaye, usa ka panon sa kababayen-an nga ang katunga hubo, uban sa mga kadungganan nga ubos pa kay sa usa-usa ka inahan nga iro, ang mikatawa sa usa ka tigulang babaye nga nagsul-ob sa hataas nga sinina. Paminaw dinhi, kamong mga hiwi nga kababayen-an, anaay iyang naangkon nga wala kamo mahibalo niini. Siya anaay maayong dungog. Wala man gani kamo mahibalo kung unsay tawag niini. Inyo nang nawala kini sa kona pa, halos. Wala man gani kamo mahibalo sa husto gikan sa sayup; siya nahibalo. Anaay iyang gitipigan nga usa ka butang sa iyang kasingkasing nga walay inyong hingbakaan bahin niini. Inyo giwala kini; dili na gayud kini makita. Ayaw siya paghingnanli nga kinaran, ug uban pa, nga sama niana. Anaay iyang nahibaloan nga kamo walay nasayran bahin niini. Iyang gitipigan sa iyang kasingkasing, ang bahandi sa kaligdong. Wala kamo mahibalo og usa ka pulong niini. Ang inyong inahan nagpadaku kaninyo nga ingon niana. Ang inyong pastor nagtugot niini; nagapakita kung hain siya nagabarog. Ako nagawali mahitungod kaniya dinhi karon. Kita n'yo? Tan-awa kung hain ka, sa mga kasimbahanan?

<sup>168</sup> Si Jesus nag-ingon, “Kining tanan nga Kasulatan kinahanglan matuman.” Ug Kini natuman na.

<sup>169</sup> Matikdi, “Maingon nga si Jannes ug si Jambres mibatok usab kang Moises,” siya motungha dihadhi, ang pipila kanila. Dili, karon, siya wala maghisgot bahin sa Metodista, Baptist, karon; wala sila sa eksena. Kita n’yo? “Apan maingon kang Jannes ug kang Jambres nga mibatok kang Moises ug kang Aaron, mao man usab sila; tawong sinalikway ang kaisipan mahitungod sa Kamatuoran,” nabalitok ngadto sa mga dogma ug mga pagtulonan sa simbahan, inay sa Biblia.

Ug unya si Jannes ug si Jambres makahimo pagbuhat sa bisan unsang butang nga mahimo ni Moises. Kita n’yo, “maingon nga si Jambres,” Kita n’yo ang pagkamanagsama niini?

“Maingon nga si Jannes ug si Jambres mibatok kang Moises, maingon man usab kining tawhana nga sinalikway ang kasipan mahitungod sa Kamatuoran, mosupak Niini,” dili gusto mahimo Kini nilang kasilingan, dili gani makigtambayayong uban Niini, walay pasilabot bahin Niini. Apan matud pa, “Ang ilang mga binuang madayag ra unya.” Kung kanang Pangasaw-onon motindog sa Iyang baruganan ug lalinon ngadto sa kalangitan, kini madayag na, ayaw’g kabalaka; sama kang Moises, sa dihang iyang gipagawas ang mga anak sa Israel, ug mipanaw gikan sa Egipto, ug ang Egipto miunlod. Sige.

<sup>170</sup> Si Jesus miingon, “Ang tibuuk Kasulatan gihatag pinaagi’g lamdag, tungud niini kanang tibuuk Kasulatan kinahanglan mamatuman.” Kung Siya . . .

Ilang gipangutana Siya, nagkanayon, “Imong gihimo ang Imong Kaugalingon nga Dios.”

<sup>171</sup> Siya mitubag, “Kamo, diha sa inyong kaugalingong balaod, nagtawag niadtong mga propeta nga Kinsa ang Pulong sa Ginoo midangat, inyong gitawag sila nga mga ‘dios,’ ug sila man.” Nagkanayon, “Nan unsaon man ninyo ang paghukom Kanako kung Ako moingon nga Ako ang Anak sa Dios? Kining tibuuk nga Kasulatan gituga pinaagi’g lamdag; Ang tanan Niini kinahanglan nga madayag, ang tanan Niini kinahanglan nga mamatuman.”

Tan-awa diha, ang ilang pagkabuta hilabihan, sila nahaylo pag-ayo sa pulong sa tawo inay nga madani sa Pulong sa Dios. Mao kana kon unsay nakapahimo sa kababayenan pagbuhat niana. Mao kana kon unsay nakapahimo sa magwawali pagbuhat niana. Sila nadani sa obispo inay kang Jesus. Sila nahaylo diha niini, uban sa ilang-uban sa ilang panudlanan sa salapi, usa ka dakung congregasyon.

<sup>172</sup> Tan-awa kung ako inila ba. Kuhaa ang katawhan, gikan sa Jeffersonville, uban sa gamay’ng pundok dinhi sa Jeffersonville; kuhaa ang mga taga gawas, sa Jeffersonville, gikan niining maong tabernaculo niining buntaga, walay akong o anaay tunga sa dosena aron walihan. Unsa man kini? Siya gilangkub sa tibuuk kanasuran; gikan sa New York, gikan sa Massachusetts,

ngadto sa Boston, Maine, Tennessee, Georgia, Alabama, ug libot sa kanasuran. Sila nagakatigum. Amen! Mao kana kon unsa ang Iyang giingon. “Maanaay Kahayag sa panahon sa kagabhion.”

<sup>173</sup> Sila dili makaila sa Kahayag sa kagabhion. Mao kana kon unsa ang hinungdan. Dili lang siya nagaila Niini. Siya hilabihan ka buta. Ang Biblia nag-ingon nga siya buta.

<sup>174</sup> Ang Russia naila lamang dinhi sa kalibutan, diha sa syensya, dili molapas sa kap-atan ka tuig ang milabay. Nahibalo kamo, sa diha ang Unang Gubat sa Kalibutan nahitabu, sila wala gayud. . . Wala nila gipanumbaling ang Russia. Igsoong Roy. . . Kadto mga panon lamang sa mga burong, dagkung karaang mga taga Siberia, mga bungoton ang dagway, ug dili nakaila sa too ug wala nga kamot. Husto kana, ang Russia, apan iyang giila ang iyang tahas. Kinahanglan nga buhaton niya kini aron matuman ang Kasulatan. Nahibalo kamo sa akong mga profesiya kung unsay akong giingon nga mahitabo, kon unsaon nga silang tanan mahiusa diha sa cumunismo. Karon siya ang naga-una sa kalibutan diha sa syensya. Ulahi ra kita kaniya. Ang tanan pang nahibilin sa kalibutan ulahi ra kaniya. Siya ang naga-una sa iyang dapit. Iyang bag-o lang naila nga siya utokan, usab.

<sup>175</sup> Matikdi, ang tawo adunay samang unom ka mga galamhan nga siya anaay na sa unom ka libo ka tuig na ang milabay. Unom na ka libo ka tuig ang milabay, pinaagi sa galamhan nga anaa kaniya, iyang gihimamat ang iyang yutan-ong puy-anan ug nag-alagad sa Dios. Ug karon, sa milabay nga kapitoan ug lima ka katuigan, kanang tawhana miabot sugod sa kabayo ug sa kalesa, hangtud pagka astronaut. Ngano? Siya mitalikud gikan sa iyang pagtoo sa Dios, ug gitugyan kini ngadto sa iyang mga galamhan ug sa iyang kinaadman ingon nga tawong linalang. Nahimatikdan ba ninyo kini? Siya mihunong sa pagsalig sa Dios. Siya nagasalig sa iyang kaugalingon.

<sup>176</sup> Sama niining babayeng walay pagtotoo. Unsay iyang ngalan, didto sa Washington, nga nag-usab niining tanan? [Dihay miingon, “Murray.”—Ed.] Unsay iyang ngalan? [“Murray.”] Murray, siya nag-ingon, “Samtang kita adunay kasundalohan ug panakayang iggugubat, wala nato kinahanglana ang karaang Jehova.” Uh-huh. Dili ko igsapayan kung unsay anaa kanato.

Si Jehova o wala, alang kanako. Mangaunlod na ang kasundalohan ug ang panakayang iggugubat, ug mahitabo kini, apan si Jehova magpabilin sa kahangturan. Samtang ako kabahin Niya, ug sa Iyang Anak, ako magapabilin uban Kaniya sa hangtud; dili pinaagi sa akong pagkatinawag o sa akong pagpili, kondili pinaagi sa Iyang pagpili. Amen, amen! Wala gayuy atong nahimo bahin niini. Siya mao ang Bugtong! Ihatag Siya kanako o ihatag kanako ang kamatayon. Pasagdi na ang kanasuran mobarug ug mapukan; si Jehova magapabilin. Kini nabuhat na Niya, sa tibuuk kapanahonan; sa dihang napukan

ang Roma, sa dihang napukan ang Egipto, ug ang uban pa kanila nangapukan. Ug sa gihapon Siya nagapabilin nga Jehova. Oh, halleluia! Akong gibati ang pagkarelihiyoso.

<sup>177</sup> Ang hinugdan nga ang Russia nakaamgo, iyang kinahanglan gayud. Sama lamang sa Israel nga kinahanglan nga mosulad na sa maong yutang natawhan. Kinahanglan sa Dios nga abugon ang Israel pabalik sa yutang natawhan, alang sa mga Trumpeta. Ug maingon usab nga kinahanglan sa Dios itukmod ang Russia nganha, sa cumunismo, aron buhaton ang sibo sa unsay gipangagna nga iyang pagabuhaton.

<sup>178</sup> Ang tawo ug ang iyang unom ka mga galamhan miduyog pag-uswag lamang, sa kabayo ug sa kalesa, nga nagasalig sa Dios. Sulod sa katapusang kapito-an ug lima ka mga tuig, siya mihunong sa pagsalig sa Dios. Sa dihang ilang gipirmahan ang batakang balaod niining Estados Unidos, ilang gibutang ang Dios sa tanang butang nga ilang gibuhat. Karon ni usa ka tigum wala gani sila, ug dili gani nila ginasangpit ang Iyang Ngalan. Husto kana. Sila nagsalig sa kamapahitas-on sa ilang syensya, sila, ang ilang kaabtik sa ilang syensya, o ang malaw-ay'ng panon. Kana husto gayud. Ang tibuuk kalibutan gilamoy na diha sa pagkawalay alamag sa Biblia. Ang bi- . . . tibuuk kalibutan mitalikud na sa Dios.

Apan, pamalandunga lamang, diha gayud sa taliwala nianang tanan, ug ang mga denominasyon sa simbahan ug ang tanang pang seminaryong kalaw-ayan ug uban pang butang, ang Dios gidawat ang Pulong sa Iyang propeta ug misapsap sa usa ka Pangasaw-onon nga magatoo. Nag-ingon nga Iyang buhaton kini. Siya nagsapsap gikan nianang butang nga unsay Iyang gisaad nga Iyang pagabuhaton.

<sup>179</sup> Sila nagsalig sa ilang tawhanong kaalam, sa ilang tawhonong syensya, ug uban pa; gitalikdan ang Dios, ni Kinsa kanhi iyang gisaligan. Ang Estados Unidos gitalikdan na ang Dios. Ila pa gani Siya gipagawas sa tulonghaan, nga niana ang atong mga kabataan dili na gani makadungog bahin Kaniya. Ilang gisalikway Siya sa tulonghaan. Karon sila naninguha na sa pagpapas Kaniya diha sa mga dolyar, nianang “Sa Dios kami nagasalig.” Ilang papason kini gikan sa pagpanumpa sa bandera, nianang “Usa ka nasud ilalum sa Dios.” Ilang papason kana.

<sup>180</sup> Kita n'yo, sila midangup sa ilang kaugalingong mga pagbati ug sa ilang kaugalingong mga galamhan. Tungud kay, sa miaging kapito'ag lima ka tuig, siya wala miusab bisan gamay diha sa iyang mga galamhan, siya mao ra sa gihapon nga tawo nga kaniya ang Dios naglalang sa sinugdan.

Apan, sa katapusang mga adlaw, dili ba kamo makaila kung hain na kita? Ug ang iglesia mitalikud na, gikan sa Dios, diha niana, ngadto sa seminaryo ug kasinatian, ug uban pa, inay sa



maong Pulong. Wala gani nagaila Kaniya sa ilang mga tigum, sa ilang mga tulonghaan, o wala gayud, bisan sa unsa pa.

<sup>181</sup> Ang Israel, sa milabay nga kaluhaag lima ka mga tuig, miila sa butang nga maoy nagdala kanila ngadto sa yutang natawhan, sumala sa gikasaad. Wala sila mahibalo kung giunsa kadto sa pagkahimo. Sila nag-antus sama sa tanang mga butang, ang pagkamartir, sa ilalum niadtong mga Trumpeta, apan sila diha na sa ilang yutang natawhan. Sila wala mahibalo sa kon ngano.

<sup>182</sup> Nganong nahigmata man ang Russia? Nganong nahigmata man ang mga kanasuran? Ngano ang tawo nahimo nang nagmalampuson? Samtang ang mga syentista, sa milabay nga tulo ka gatus ka tuig, ang usa ka taga Franciang syentista nagpaligid sa usa ka bola nga may gikusgon tadlas sa kalibutan, ug nagpamatuod, pinaagi sa syentistanhong panukitsukit, nga “Kung ang tawo makahimo sa talagsaong gikusgon nga katloan ka milyas sa usa ka takna, ang kabutaran maoy makapadagit kaniya gikan sa yuta; sumala sa iyang gibug-aton, sumala sa kabug-aton sa bola.” Karon makahimo na siya’g napulog pito ka libo ka milyas sa usa ka takna, kita n’yo, sa gihapon naninguha pa sa pagpalambo. Iya bag-ohay pa lang nasayran kana, bag-ohay lang. Ngano man? Kinahanglan maingon gayud niana.

<sup>183</sup> Aba, ang simbahan kaniadto nagbarug sa ibabaw sa bato ni Jesus Cristo. Bisan pa kung unsay ikasulti ni bisan kinsa, sila nagpabilin mismo uban nianang Pulong, ang mensahe sa panahon; ni Luther, ni Wesley, ug pabalik didto. Ug karon sila nanagbalik na sa mga tradisyon. Nganong kini naingon man niini?

<sup>184</sup> Sa milabay nga kaluhaag lima ka tuig, ang Israel mao pay pagpakaila nga sila diha na sa yutang natawhan alang sa usa ka butang. Kadto gipanagna na nga magkahiusa sila pagbalik; si Oseas maoy nag-ingon. Atong gibasa kini dili pa lamang dugay. Tabangan kita sa Dios sa pagsabot niini! Maayo.

<sup>185</sup> Sa samang higayon, ang Pangasaw-onon naila na ang Kahayag sa kagabhion, nagsugod pa lamang sa pag-ila. Ang gigutom nga mga pentecostal nagsugod na sa pag-ila nga kadtong ilang mga kapunongan walay bisan unsang butang nga ilang ginapangita, hilabihan ang ilang pagkahiwi ug pagkabahinbahin. Kita n’yo, panahon na sa pag-ila, pag-ila. Kamo kinahanglan moila.

Ang kalibutan miila na. Ang mga nasud miila na. Ang syensya miila na. Ang yawa miila na nga mao na kini ang panahon nga iyang mapahugno ang kababayen-an, mapahugno ang iglesia, mapahugno ang katawhan. Miila siya niini.

Ug ang Dios nag-ila nga anaay katawhan sa yuta nga Iyang gikatagana nang daan ngadto sa Kinabuhi. Iyang giila nga mao na kini ang panahon sa pagpadala sa Iyang Mensahe. Iyang

nabuhat na kini. Ang katawhan miila Niini, ang panahon sa Pangasaw-onon miila na sa Kahayag sa kagabhion.

<sup>186</sup> Kung giila pa lang unta sa Sodoma ang iyang mga adlaw, sa dihang iyang nakita kadtong mga mensahero nga minglugsong didto, sama kang Billy Graham ug Oral Roberts!

<sup>187</sup> Karon, ang pipila ka malaw-ay'ng tawo sa Phoenix bag-ohay lang mitindog ug miingon. . . mipatugtog nianang bahina diha sa-sa teyp, ug miingon nga nag-ingon ako dinhi, ako "kinahanglan nga bautismohan sa Ngalan ni Jesus," nag-ingon niana. Ug unya miingon, "Karon nakita ninyo *dinhi*, dinhi niini siya nag-ingon. . ." Samtang naghisgot ako bahin sa Africa, kon giunsa nila ang pagbautismo katulo nga pinaatubang, ug pinatalikud. Nagkanayon nga nag-ingon ako, "Walay kalainan." Kita n'yo, wala gayud niya gipatugtog ang habiling bahin sa teyp; ang katong bahin lamang, ug gipahunong kini.

Nga, mahimong mabilanggo sa pagbuhat niini. Silang mga teyp anaay tiunay nga prangkisya. Walay si bisan kinsa nga magdaot kanila. Ayaw'g buhata kana. Kamo-kamo-kamo magkaproblema sa balaod. Apan buhaton ba nato kini? Dili. Siya miingon, "Pasagdi sila." Ang Dios nagtug-an kanako kung unsay mahitabo. Bantayi lamang, panid-i lang kanang tawhana. Kita n'yo?

<sup>188</sup> Sa samang higayon, ang Pangasaw-onon naila na ang Kahayag sa kagabhion.

Kung ang Sodoma miila pa lang unta sa ilang takna!

<sup>189</sup> Karon, kining mao ra nga tawo ang nagbutang sa teyp, nga nag-ingon, "Tan-aw dinhi, kamong mga katawhang Pentecostal," nagkanayon, "ug kamong mga Baptist. Kining tawhana, mini nga propeta, si William Branham," kita n'yo, "nag-ingon nga si Oral Roberts ug si Billy Graham atua sa Sodoma." Kita n'yo, dayon gipalolong ang teyp; mao ra kadto, kita n'yo.

Dili mopadayon aron sa ma-ingon, nga, "Sila mga mensahero ngadto sa Sodoma." Dili diha sa Sodoma, "Sila atua didto ingon nga mensahero ngadto sa Sodoma." Ang bisan kinsa nasayud nga akong gisulti kana. Ipatugtog ang inyong teyp.

"Si bisan kinsa ang magataktak o magadugang niini, ang ingon pagataktakon gikan kaniya." Kini mao ang Pulong sa Ginoo. Kini nagapabilin nga ingon niana.

<sup>190</sup> "Kung ang Sodoma miila pa lang sa iyang mensahero, siya unta anaa pa karon," Si Jesus nag-ingon, kung giila pa lang unta niya sama kang Abraham nga miila.

Si Abraham nahibalo nga anaay gisaad nga anak nga umaabot. Apan siya nahibalo nga kinahanglan adunay kausaban, tungud kay siya tigulang na kaayo, ug maingon

man usab si Sara. Apan sa dihang iyang nakita niadtong Usa ni Kinsa makahimo sa pag-ila sa hunahuna ni Sara, sa Iyang likud, iyang naila ang takna nga iyang gipuy-an. Siya miingon, “Akong Ginoo, tugoti ako pagkuha sa diyotay’ng tubig dinhi ug ihimasa sa Imong tiil.” Sila mikaon sa tipik sa tinapay. “Akong gipangamuyo Kanimo, pagpabilin una sa makadiyot lamang,” kita n’yo, dinhi, “akong G-i-n-o-o,” dakung G-i-n-o-o, “Elohim.” Iyang giila nga ang Dios nakigsulti kaniya diha sa tawhanong unod. Iyang giila ang iyang ilhanan, ug napanalanginan sa Ginoo.

Ang Sodoma wala moila sa ilang adlaw, ug gisunog. Si Jesus nag-ingon, “Maingon kanhi niadtong adlaw, maingon usab niini sa dihang ang Anak sa Dios. . . o ang Anak sa tawo igapadayag na.”

<sup>191</sup> Karon, ang iglesia dili giila ang iyang adlaw. Sama sa Israel, napugos pagbalik ngadto sa Palestina, siya pagapugson ngadto sa World Council of Churches. Ngano? Iyang dili giila ang iyang takna. “Mga katawhan, gumula kamo kaniya, ayaw pag-ambit sa iyang kasal-anan!” Kalagiw, sa inyong kinabuhi, o kamo mahimong hiabtan sa marka sa mapintas nga mananap ug wala nay mahimo pa niini.

“Siya nga mahugaw papadayona gihapon siya sa pagkamahugaw. Siya nga balaan,” dili kay *mamahimong* balaan, “balaan na karon. Siya nga balaan,” dili usa ka pug- . . . babayeng pugdol ug buhok; siya dili mahimo. Karon, hignipit ra kaayo kana paminawon, apan mao kana ang Kasulatan. Ang Biblia naga-ingon, “Iyang gipakaulawan ang iyang ulo,” ug ang iyang ulo mao ang iyang bana. Ang Ulo sa bana mao si Cristo, tungud niini iyang gipakaulawan si Cristo. Unsaon man sa babaye sa “pagka-walay kadunganan” ug dili mahimong “mahugaw”? “Siya nga pugdol ug buhok papadayona niini. Papadayona ang lalaki, ang babaye nga nagasul-ob sa mga purol papadayona sa pagsul-ob kanila. Siya nga nagalimod sa Pulong papadayona sa paglimod Niini.”

“Apan siya nga balaan papadayona sa pagkabalaan. Siya nga matarung papadayona sa pagkamatarung; ang matarung nga Pulong sa Dios, ang Anak sa Dios nga nadayag. Papadayona ang pagkabalaan, papadayona ang pagkamatarung!” Ilha! Oo, sir! Dili mga adlaw. . .

Ang simbahan wala nag-ila sa iyang adlaw.

<sup>192</sup> Sama sa Israel, balik sa iyang yutang saad, wala siya mahibalo kung giunsa niya ang pagpakabalik didto. Dihadiha nahibalik lang siya didto. Ngano man? Ang Nasudnong puwersa maoy mipahimutang kaniya sa iyang dapit.

Karon akong igasulti ang usa ka butang. Ang nasudnong puwersa mipahimutang sa Israel sa iyang yutang natawhan; ang nasudnong puwersa mopahimutang sa iglesia diha sa

World Council of Churches; apan ang gahum sa Dios maoy mopahimutang sa katawhan diha sa Pangasaw-onon. Ang kalibutanong mga puwersa *dinhi* niini, ug ang kalibutanong mga puwersa *didto* niadto, apan ang mga puwersa sa Dios pahitaas. Ang Espiritu sa Dios, nga mao ang Pulong sa Dios, “Ang Akong Pulong Espiritu ug Kinabuhi,” mopahimutang sa Pangasaw-onon diha sa Iyang dapit. Kay, Iyang ilhon ang Iyang puwesto diha sa Pulong, dayon Siya anaa na kang Cristo, nga maoy mopahiluna Kaniya diha sa Iyang dapit. Walay nasudnong puwersa ang mohimo niini. Apan ang nasudnong puwersa maoy miabog sa Israel ngadto sa yutang natawhan; ang nasudnong mga puwersa sa Council of Churches maoy moabog sa matag kapunongan pasulod niini; apan ang Gahum sa Dios maoy magatuboy sa Pangasaw-onon ngadto sa Himaya, gikan niini.

<sup>193</sup> Oh, mga katawhan, ilha ang inyong adlaw, maingon nga si Jesus nagpasidaan kaninyo; sa ilhanan sa Sodoma, ug ang kahimtang sa iglesia niining adlaw.

<sup>194</sup> Tan-awa kung unsay Iyang giingon niining adlaw nga magakahitabo. Paminaw niini pag-ayo. Ang ilhanan sa Sodoma mahitabo sa maong adlaw; ang ilhanan sama kang Abraham, niadtong adlaw sa atubangan sa Sodoma, kadtong gipahigawas. Ang tanan niining mga butanga nga gipanagna na, magakahitabo na karon. Bantayi ang adlaw nga inyong ginapuyan. Milapas na kita niini ug milapas na niini.

<sup>195</sup> Karon Iyang gisaad nga magpadala kaninyo ug Langitnong Kahayag, aron sa pagpahinog sa Binhi nga Pulong nga igapugas alang niining adlaw. Ang Binhi ania na *Dinhi*. Ang Binhi mao ang Biblia. Ngano man? Si Jesus mao ang nag-ingon. “Ang Pulong mao ang Binhi nga gipugas sa magpupugas.”

Ug, karon, sa dili ka pa makabaton sa bisan unsang abot, bisan pa kung imong gipugas ang binhi, kini kinahanglan nga anaay kahayag aron sa pagpahinog nianang binhi, o madunot kini ug dili magpulos; madugta kini. Apan kung kini anaay binhi diha sa yuta, ang maayong yuta, uban sa maayong kainit sa adlaw diha niini, kini kinahanglan mahinog gayud.

Ug Iyang gisaad kana sa katapusang mga adlaw, sa panahon sa kagabhion, ang Anak motungha aron sa pagpahinog nianang maong Binhi. Ang Binhi gikawali na. Ang Anak sa Dios nagapahinog nianang Binhi, pinaagi sa pagpaluyo Niini, ginaduso Kini pagawas sa inyong atubangan ug ginapamatud-an nga Kini husto. Nakuha ba ninyo kini? [Ang congregasyon naga-ingon, “Amen.”—Ed.] Ilha ang inyong adlaw.

Ako patapos na karon. Panahon na karon sa pagtapos.

<sup>196</sup> Ug ang datu, buta, edukadong mga taga Laodicea magapagawas sa Pulong gikan sa ilang taliwala. Ila na bang nabuhat kini? [Ang congregasyon naga-ingon, “Amen.”—Ed.] Siya nag-ingon nga ilang buhaton kini.

Maingon ang mga propeta sa karaang panahon gipadala aron sa pagpamatuod sa gisaad nga Pulong sa ilang adlaw, aron ang mga katawhan nga gipili nang daan, sa ilang adlaw, makita Kini. Sama sa babaye didto sa atabay, sama kang Nathan, sama kang Bartimaeus nga buta, sama kang Pedro, ug ang uban kanila nga nag-ila Niini. Siya mao kadtong Pulong. Ug ang bunga, “Kung Akong dili ginabuhat ang mga buhat nga gisaad sa Amahan nga Akong pagabuhaton, nan ayaw kamo pagtoo Kanako. Apan kung Akong ginabuhat ang mga buhat, bisan kung dili kamo nagatoo Kanako, toohi silang mga buhat. Sila maoy nagtug-an kaninyo kung Kinsa Ako.” Nakuha ba kini? Maayo, ayaw’g pakyasa ang adlaw, nga gipadala. Ang mga kalalaken-an ug mga kababayen-an sa ubang mga adlaw nag-ila Niini, ug nakasulod niini ug nangaluwas.

<sup>197</sup> Mga pentecostal, oh, sus, nganong dili man kamo nagaila sa inyong adlaw? Ilha ang adlaw sa panahon sa kagabhion. Ania na kini, ug ania na kini dinhi, nga, aron sa pagpamatuod sa pag-abot ni Cristo, aron pamatud-an kini. Ania na kita sa katapusan. Ilha ang inyong adlaw.

<sup>198</sup> Ako nahibalo nga akong nalangan kamo pag-ayo. Ika-napulog duha na ang takna karon. Apan, ako miangay niining Pagkaon, Kini ang Kinabuhi. Mao Kini. Mao Kini, alang sa magtotoo. Ilha ang adlaw nga inyong ginapuy-an, ug ang ilhanan sa panahon.

<sup>199</sup> Tan-awa kung hain na ang mga butang: Ang Israel; kon hain ang iglesia; kon hain na ang mga maulag; kon hain na nagabarug ang Pangasaw-onon. Unsa nay nahibilin? Ang mosunod nga butang, mao na ang paglalin sa Pangasaw-onon. Siyempre, ang matag kasimbahanan nanagpaabot sa usa ka dakung butang. Ang Pentecostal nagkanayon, “Himaya sa Dios! Magaabot ang adlaw nga ilang pagabuhaton *kini*, ug ilang pagabuhaton *kana*.” Kita n’yo, sila mga profesor. Sila nagatoo.

<sup>200</sup> Sama, sa usa ka higayon, si Caiapas nag-ingon, “Dili ba angayan kini nga usa lamang ka tawo ang mamatay, ug dili ang tibuuk nasud malaglag?” Siya mao ang labaw’ng sacerdote, nag-ingon ang Biblia, ang hinungdan nga iyang gisulti kadto. Siya nagpropesiya, nga walay pagkasayud unsay iyang ginasulti. Apan iya bang naila ang hingpit nga kamatuoran niini, nga iyang ginapapatay ang maong Dios nga iyang giangkong nga maoy labaw’ng sacerdote?

Mao kini sa gihapon, karon! Ilang gipaabot, diha sa umalabot, alang sa usa-usa ka dakung panahon nga umaabot.

<sup>201</sup> Aba, ako naga-adto sa Business Men’s convention uban kanila. Sila nagkanayon, “Himaya sa Dios!” Silang mga magwawali nanindog ug gidasig gayud ang katawhan, ug nag-ingon, “Anaay umaabot nga dakung pagkapukaw. Ang kamot sa Ginoo magaduaw sa ibabaw sa yuta!” Ug kon giunsa sa

katawhan ang pagpanggula, nagadalagan sama sa . . . Ug wala nagahunahuna nga kana nailalum sa mga Trumpeta alang sa Israel. Nganong ilang ginabuhat man kini? Tungud kay sila mga profesor nga mga Cristohanon, ug wala nagahunahuna. Ni si Caiapas wala naghunahuna kung unsay iyang ginabuhat. Ug sila wala nagahunahuna nga ila nang ginasalikway ang Mensahe nga gipadala alang kanila. Amen!

<sup>202</sup> Ang matag bahin sa Kasulatan, ato nang nahisgotan sa matag adlaw, ug sa matag semana, hangtud nga kini maoy dili na malalis nga Kamatuoran. “Kung ang buta dili makahimo sa pagdawat Niini,” Si Jesus nag-ingon, “pasagdi sila. Kung ang buta nagaagak sa buta, sa gahung silang tanan mangahulog.” Ako wala mahibalo kung kanus-a, wala ako mahibalo kung hain, apan ako nahibalo nga umaabot na kini.

<sup>203</sup> Nahibalo kamo, akong nakita kon nganong si Satanas dili buut nga buhaton ko kini. Kagahapon, dili maayo ang akong gibati. Dili ako makabaton og Pulong gikan sa Ginoo. Ako nang gibuhat ang tanan nga akong nahibaloan kon usaon sa pagbuhat, ug dili ko mahimo. Ug kaganinang buntag, sa dihang ako nagbangon. . . . Ako nagkaon sa pipila ka mais, kagahapon, ug maingon nga daw anaa ra kini sa akong tiyan. Dili gayud maayo ang akong gibati, ako gayud-ako gayud naglisud sa pagkagawas gikan niini. Akong nahunahuna, “Unsay nahitabo sa kalibutan? Ako moadto didto, ug ako wala mahibalo kung unsay akong igasulti. Ug, Ginoo, ako dili gani makahinumdum sa usa ka Kasulatan sa akong hunahuna, aron isulat. Ako dili makakaplag sa usa ka butang.” Ako dili gayud nasayud kon unsay pagabuhaton.

Unya, pagkatapus nga ang Mensahe misugod pag-abot kanako, si Satanas nagpadayon sa pag-ingon, “Dili pa maayo ang imong gibati. Ang imong ulo nagalabad. Ikaw may sakit. Dili ka makaadto didto. Dili ka makatindog didto. Mao *kini* ang mahitabo, ingon *niana* ang mahitabo.”

<sup>204</sup> Akong nahinumduman, usa niana ka panahon, ang usa ka sugilanon sa usa ka cockney sa England. Siya usa ka yanong tawo lamang. Ug sila miingon nga ang-ang-ang hari, usa sa mga hari sa unang mga panahon magaadto sa iyang-iyang palacio. Ug, kini, siya walay usa. . . . Siya adunay mensahe nga iyang kinahanglan ipadala, usa ka mensaheng dinalian, tungud sa kaaway. Ug busa siya-siya-siya miingon niining gamay’ng tawo nga nagatindog didto, matud niya, “Ania, dawata kining mensahe, dalha kining mensahe! Pagdali ngadto sa *usa-usa* ka dapit, ug isugo *kini* nga mabuhat dayon.” Ug miingon siya, “Dalha kining sitro diha sa imong kamot. Kana maoy magapamatuod kanimo, nga akong. . . ikaw pinadala gikan kanako.”

205 Ug iyang gisulod kini sa ilalum sa iyang kupo, ug milakaw siya. Ug ang mga bantay bisan diin nagasalanta kaniya, ug ang tanang uban pa. Nagasinggit, “Pahawa! Adunay akong mensahe sa gikan hari.” Amen. “Ako ang mensahero sa hari,” usa ka gipaluyohan nga pulong.

206 Ako namalandong, “Satanas, pahawa gikan sa akong dalan! Ako adunay Mensahe sa Hari. Kinahanglan nga ako moadto.”

207 Usa niana ka panahon sa dihang ilang gipatay ang Principe sa Pakigdait, ug gibutang Siya sa lubnganan, ug gisampongan ang lubnganan, ug ang kamatayon mipugong Kaniya sulod sa tulo ka adlaw ug gabii. Apan sa buntag sa Pagkabanhaw anaa na sa Iyang kamot ang sitro, ug misinggit, “Pahawa, kamatayon! Pahawa, lubnganan! Pag-abli! Ako mao ang Mensahe sa Hari. Ako kinahanglan mogula aron pamatud-an kining pagkabanhaw. Ako mao ang pagkabanhaw ug Kinabuhi.” Halleluia! Maayo na ang akong gibati karon.

Kini mao ang Mensahe sa Hari. Atong ilhon Kini, mga higala, kay kita gipanagtawag sa panaghiusa alang sa paghuyop sa Trumpeta. “Kay ang Trumpeta sa Ginoo pagapatunggon, ug dayon ang panahon matapus na.”

208 Iya nang gitigum ang Israel. Sa tulo ka adlaw, sa ikatulo ka adlaw Siya nag-ingon nga Iyang pagabuhaton kini. Kaluhaag pito ka gatus ka tuig ang milabay. Sa niadtong ikatulong adlaw Siya miingon nga Iya silang tigumon, ug Iyang nabuhat na kini. Siya miingon nga Iyang ipahibalo ang dalan sa Kinabuhi. Anaa na kamo, nagahulat na lang karon alang sa Pangasaw-onon nga mohawa na aron sila makasulod, ang duha ka mga propeta, Hebreohanong mga propeta, nga magaila.

209 Inyong nahinumdom ako nga nagatindog didto sa Cairo, aron moadto didto, sa dihang si Lewi Pethrus miingon, “Igsoong Branham, kung ila gayud makita kana. . . Sila nagtoo sa ilang mga propeta.”

210 Matud ko, “Usa kini ka maayong butang alang kanako.” Kita mo kung unsa ang tawo? Apan tan-awa ang gracia sa Dios? Matud ko, “Akong basahon kining Bag-ong Tugon.” Ilang ginabasa Kini. Si Lewi nagpadala kanila, kapin sa usa ka milyon, didto, si Igsoong Lewi Pethrus nga taga Sweden. Ilang basahon Kini, nangabot-abot kini didto, kadtong mga Judio; dili sama niining mga modernong pundok sa mga Judio, apan kadtong atua sa ilang yutang natawhan. Ug mianhi, matud niya, “Kung kini mao ang Mesiyas, atong tan-awon siya nga magabuhat sa ilhanan sa pagkapropeta, kami magatoo niini.”

211 Si Lewi Pethrus miingon, “Igsoong Branham, anaa na ang kahigayonan. Mao na kana ang kahigayonan. Dihang nag-ingon kanako niana, nga kini usa na ka higayon. Anaay akong masakyan,” nagkanayon, “padulong mismo didto.”

Dihay tawo nga miduol ug milingkod didto, si Igsoong Arganbright, matud pa, “Igsoong Branham, makapa-alarma lang kana sa Israel! Sa pagbutyag kanila Niini, ug pagpakita’g ilhanan sa pagkapropeta. Ilang toohan kini.”

<sup>212</sup> Matud ko, “Ginoo, ania ako, andam na.” Misakay sa eroplano; gikuha ang salapi ug milukat ug tiket; mihunong sa Cairo. Matud ko, “Oo, andam na ako.”

<sup>213</sup> Ang Espiritu Santo miingon, “Dili kini mao ang imong dapit. Dili kini mao ang imong panahon.” Kita n’yo, nag-una ka sa imong kaugalingon. Namalandong ako, “Oh, sus! Naabot na ako dinhi; Ako-ako magapadayon.”

<sup>214</sup> Dihay miingon, “Hunong mismo dinhi! Ayaw pagpadayon nianang dalana. Balik ngadto sa India. Ayaw pagpadayon diha. Lakaw ngadto sa India, apan ayaw pagpadayon dinhi.”

<sup>215</sup> Naghunahuna, “Ngano man?” Samtang ako milakaw sa luyo sa silonganan sa eroplano, matud ko, “Ginoong Jesus, unsay ipasabot niini?”

Dayon Iyang gipadayag kanako. “Walay Gentil. Kining maong mga propeta mao kana sila.” Kini kinahanglan nga mahisibo gayud sa Kasulatan. “Si Moises ug si Elias kinahanglan ang moabot.” Ug, labot pa, ang Pangasaw-onon wala pa makuha. “Ug silang mga propeta mobalik ug ilang pagabuhaton ang ilhanan sa propeta.” Kana mao ang Kasulatan. Diha kining tanan mamatuman dayon, sa hingpit, ang Israel ingon nga nasud mahimugso sa usa ka adlaw. Amen! Ang Kahayag sa kagabhion nagadan-ag na!

Maanaay Kahayag sa panahon sa kagabhion,  
 Ang dalan sa Himaya imo gayud hikaplagan;  
 Sa gidulngan sa tubig, maoy Kahayag karon,  
 Gilubong sa bililhong Ngalan ni Jesus.  
 Bata’g tigulang, hinulsolan ang tanan ninyong  
 sala,  
 Ang Espiritu Santo magapakig-uban gayud;  
 Ang mga Dan-ag sa kagabhion miabot na,  
 Kini’ng kamatuoran nga ang Dios ug si Cristo  
 Usa ra.

<sup>216</sup> Ania na kita sa katapusang panahon, higala. Ug unya atong pamalandungon kining awit sa dinasig nga manunulat, sa dihang siya nag-ingon:

Mga nasud nagakabahin, (kini mga  
 magnapulog lima na ka tuig ang milabay),  
 ang Israel napukaw na,  
 Mga ilhanan nga ang mga propeta nag-ingon;  
 Ang mga adlaw sa Gentil inihap na lang, (tan-  
 awa ang iyang kahugawan karon) nga uban  
 mabug-at nga kasakit;  
 Balik, O nagkatibulaag, sa inyong panag-iya.



Ang adlaw sa pagtubos haduol na,  
 Ang mga kasingkasing sa tawo naluya sa  
 kalisang;  
 Pagpapuno sa Espiritu sa Dios, ihikay ang  
 inyong lampara ug hinloi,  
 Hangad, ang inyong katubsanan haduol na.  
 (Husto kana.)

Mining mga propeta nagapamakak, ang  
 Kamatuorang sa Dios gipanghimakak, (dili  
 ba kana tinuod!)  
 Si Jesus ang Cristo mao ang atong Dios.

Sila dili nagatoo Niana. Sila adunay tanang matang sa mga  
 ismo ug mga butang! . . . ? . . . tinuod. Apan ang propeta nag-  
 ingon . . . O, ang dinasig nga manunulat nag-ingon:

Kita manglakaw kon diin ang mga apostoles nagtunob.

<sup>217</sup> Hinumdumi sa akong panan-awon? Matud ko, “Kung ang  
 katawhan ni Pablo magasulod, maingon man usab ang ako,  
 tungud kay maoy akong gibuhat ang sama sa iyang gibuhat.”  
 Ako nagapabilin mismo uban Niini.

Kadtong mga minilyon nga mitunol sa ilang mga kamot, nga  
 nagkanayon, “Kaming tanan nagasandig diha!”

Unsa? Ilha ang adlaw nga atong ginapuy-an, ang panahon  
 nga atong ginapuy-an, ang ilhanan sa panahon nga niini ania  
 kita. Tingali’g ulahi na kini kay sa atong gihunahuna. Usa  
 niining mga adlawa, siya nga anaa sa gawas papabilina sa gawas  
 sa gihapon. Siya nga ania sa sulod kinahanglan magapabilin sa  
 hangtud sa sulod sa gihapon. Ang pultahan pagasirhan na.

<sup>218</sup> Kung anaay pipila dinhi niining buntaga nga wala pa gayud  
 makasulod, oh, sa Ngalan ni Jesus, minahal kung katawhan . . .

Ayaw’g tan-awa kining walay kaalam nga ulipon nga  
 nagatindog dinhi, walay kahibalo, walay nakat-onan, dili  
 edukado; Dili motan-aw niana. Apan tan-awa ang Pulong nga  
 ginapamatud-an. Tan-awa ang dakung Espiritu Santo ni Kinsa  
 maoy nagapaluyo Niini nga maoy Kamatuoran. Ania na kita sa  
 panahon sa kagabhion. Ulahi na kini kay sa inyong gihunahuna.  
 Ayaw’g . . .

<sup>219</sup> Mga kababayan-an, pataasa ang inyong buhok. Igsoong  
 babaye, palihog undanga na kanang mga mahilas nga mga  
 sinina. Isalibay kanang mga sigarilyo. Kay ang takna magaabot  
 na, nga, “Siya nga mahugaw, papadayona nga mahugaw sa  
 gihapon; ug siya nga matarung, papadayona siya nga matarung  
 sa gihapon. Siya nga ania sa sulod maanaa gihapon sa sulod; siya  
 nga anaa sa gawas maanaa gihapon sa gawas.” Ang gamay’ng,  
 hiktin nga ngilit, “Kung ang tawong matarung malisud man gani  
 maluwas, unsaon na man sa makasasala ug dili diosnon,” ang

maglilimod sa Kamatuoran, nahibalo na kamo, “hain man sila mahisangko?”

Atong iduko ang atong mga ulo.

<sup>220</sup> Karon, dinhi niining Kahayag sa maong takna nga niini ania kita, ang Kahayag sa adlaw nga niini ania kita nagpuyo; bililhon ug mga hinigugma, kamo nga gikan pa sa nagkalainlaing estados sa tibuuk nasud, buhaton ta karon, ug ako nga duyog kaninyo, dinhi niining altar, atong buhaton ang pagtulotimbang. Kumosta na man ang Espiritu sa Dios diha sa atong kasingkasing karon? Hinumdumi, ang Espiritu kadto, dili-hinukman, dili-nahugawan; sa bisan unsang doctrina sa simbahan, ug ang tanan na, hingpit na nga nawala.

<sup>221</sup> Dili mo pangahasan, pagsulay sa pagdugang diha Niana o magataktak gikan Niini. Kay, kung imong sulayan pagbutang ug hubad diha Niini, ang imong kaugalingon, ang imong bahin pagakuhaon gikan sa Basahon sa Kinabuhi. Ikaw ba nagasulay pag-sulti sa butang nga ang Espiritu wala nagsulti? Ikaw ba nagapaninguha sa paghimo Niini nga sama nga daw nagsulti Kini sa usa ka butang? O, imo lamang gidawat Kini sa tukma sumala sa giingon Niini, ug gipasagdan Kini sama niana? Ikaw ba gasumpay-sumpay, nagaputol, nagteyp, nagabuhat sa mga butang nga dili husto? Gibuhat ba nimo?

<sup>222</sup> Moingon, “Bueno, wala ko batia nga mobuhat *niini*. O, tingalig, ako-ako-ako nasayud nga ang akong simbahan dili nagatoo Niini. ‘Usa lang kana ka pulong sa tawo mahitungod Niini.’”

Kanang usa ka Tawo mao ang Dios. Ang Biblia dinhi nagingon nga dili ninyo paputlan ang inyong buhok. Kini sila . . . Ang Biblia nag-ingon nga. “Mahitabo nga ang mga babaye magasul-ob sa mga bisti nga sama sa lalaki, ug kon unsa silang mahimong kadulomtanan sa Dios.” Kon giunsa sa Espiritu Santo ang pagsulti pinaagi niini, niining kabus, dili takus nga galamiton nga nahitabo gayud nga nagatindog karon sa maong panahon nga ang gamhanang Hari nag-ingon, “Ania ang Akong lubnganan. . . Ang Akong Pulong. Ania ang Akong Sitro, diay. Dawata ang Akong Sitro, ug lumakaw, ug dalha ang Mensahe.”

<sup>223</sup> Ako nahibalo nga ang mga denominasyon naninguha pagsanta Niini, ug isalikway Kini, isalibay Kini, patiran Kini, ug tanan na. Apan, pinaagi sa gracia sa Dios, anaa na ako sa akong dalan, nagasiyagit gikan sa nasud ngadto sa nasud, gikan sa usang dapit ngadto sa usang dapit, gikan sa simbahan ngadto sa simbahan, “Gawas gikan niini!” Kini dili gidayeg, apan Kini maoy Kamatuoran.

<sup>224</sup> Dawaton ba ninyo Kini diha sa-diha sa-sa pagkasulat Niini sa Espiritu? Dawaton ba ninyo Kini diha sa Espiritu nga Kini gikahatag? Kung wala pa kini ninyo . . . Walay atong luna alang sa pagpaduol; ang inyong kasingkasing mao ang halaran.

Mahimo bang ipataas ninyo ang inyong kamot, ug moingon, “Dios, kaloy-i ako. Tugoti ang Espiritu sa Dios nga mosulod kanako, nga nagahukom kanako karon sa tanan kung mga sala, ug mga kapakyasan, ang tanan kong dautang mga batasan, ug pagkamasuk-anon, ug pagkakuti-kuti, ug pakig-awayon, ug mga kabalaka, ug tanan nang butang nga ania kanako. Ug nahibalo ako sa usa ka butang, nga ang akong espiritu dili malumo alang sa Langit. Himoa akong malumo, Ginoo, dinhi niining katapusang higayon. Kini tingalig mao na ang katapusang wali nga akong madungog. Kini na tingalig ang katapusang higayon nga akong madungog ang Mensahe. Akong gipataas ang akong kamot. Dios, kaloy-i ako.”

<sup>225</sup> Ang Dios magapanalangin kaninyo. Mga denosenang mga kamot. Karon, sa makadiyot lamang alang sa hilum nga pag-ampo alang kaninyo. Kamo nga mipataas sa inyong kamot, nagapakita nga matinud-anon kamo sa gihapon. Maingon kanako nga ang Espiritu nagapadayon pa pagtawag sa maong tawo.

<sup>226</sup> Minahal nga Dios, Ikaw nga Kinsa nahibalo sa tanang mga butang. Ug Imong gibuhat ang tanang mga butang alang sa katuyoan sa tanang mga butang, kay, ang uban kinahanglan pagahukman, ang uban kinahanglan mabutahan; ang pipila, “sama sa magkukulon nga nagbuhat sa sudlanan,” sama sa giingon ni Pablo, “ang usa alang sa pagpasidungog ug ang lain alang sa pagpasipala.” Ang usa gibuhat alang sa pagpasipala, mipadayag lamang sa usa nga alang sa pagpasidungog. Apan dili ba kini diha sa kamot sa maong Magkukulon ang pagbuhat kung unsay Iyang gusto? Dili ba kini sa gimbut-an nang daan nga laraw sa Dios, alang sa pagtawag? “Kinsay Iyang giila nang daan, Iyang gitawag. Sila nga ni Kinsa Iyang gitawag, Iyang gimatarung. Ug Kinsa kadtong Iyang gimatarung, Iyang gihimaya.”

<sup>227</sup> Tingali ang pipila kanila dinhi karon nahisama sa babaye didto sa atabay, nga mihunong na sa kahugawan, mihunong na sa pagkawalay pagtoo, mihunong na sa mga kalagdaan sa tawo, mga doctrina nga hinimog-tawo. Tingali’g una pang higayon ang ilang pagpakadungog niining mga butanga, apan may usa ka butang katingalahan nga nagpasidaan sa ilang mga kasingkasing. Anaay daghan, daghan kaayong mga kamot nga mipataas, Ginoo. Tugoti nga kanang gamhanang Magkukulon dawaton kanang panudlanan karon ug umolon kini ngadto sa usa ka panudlanan sa pagpasidungog. Ako nagtoo nga may pipila ka hinungdan, Ginoo, o dili sila magabuhat niana, dili sila magasulti niana. Ako sa gihapon nagatoo, ako nagapadayon alang kanila.

<sup>228</sup> Tugoti ang Imong ubos nga ulipon nga mangamuyo, Ginoo. Tugoti nga mangamuyo kami alang kanila, ingon nga usa nga nagabarug taliwala sa mga buhi ug mga minatay; sama

niadtong usa nga kinsa diha sa Sodoma nagapangamuyo alang sa mga Sodomanhon, “Panggula gikan niini! Gula gikan niini, pagdali!”

229 Hinaut nga moduol sila, Ginoo, nga mapaubsanon ug matam-ison ngadto sa trono sa Dios karon, diha sa ilang kasingkasing, naga-ingon, “Jesus, sugod niining adlaw, gikan karon, ako na Ikaw. Akong gibuhat kining maong panaad alang Kanimo karon dinhi, samtang ako nagalingkod dinhi sa lingkuranan diin ang Imong Espiritu miigo kanako. Kung Kini miigo man kanako dinhi, ako dili na moadto pa sa halayo gawas mismo dinhi. Dinhi mismo Imo akong gihibalag; dinhi mismo mao kon diin atong husayon kini; dinhi mismo niining ikaduhang lingkuranan, ikatulong lingkuranan, ikalimang lingkuranan, bisan unsa pa kini. Dinhi gayud niini kini mamahimo nang husayon, kay mismo dinhi mao kon diin Mo ako gihukman, ug dinhi mao kon diin Imong gisaad nga tul-iron kini. Kay bisan kung ako mahimong nahugawan ug mahugaw, ako mapaputi sama sa niebe. Akong toohan ang tanan nga Imong Pulong. Ako andam na sa paglakaw diha Niini, toohan Kini, dawaton Kini.

“Ug ako karon ginabuhat kini alang sa kahimayaan sa Dios, nahibalo nga ang akong kinabuhi walay kapuslanan alang kanako, kini dili maayo alang sa Dios, dili kini maayo sa akong mga silingan, kini dili maayo ngadto sa bisan unsa pa; alang lamang nga maayo ngadto sa yawa, aron pagbuhat sa usa ka-usa ka pahoy, aron isalibay ako bisan diin, tingalig aron mabuhat nga dulaan sa tawo aron himuon nga talan-awon, tingalig mahimong diosdios sa babaye. Dios, buhata ako nga ulipon alang Kanimo.” Itugot kini, Ginoo. Akong ginatugyan sila Kanimo karon, sa Ngalan ni Jesus Cristo, nga Imong Anak.

Uban sa pagduko sa atong mga ulo, ug sa atong mga kasingkasing.

I can hear my Saviour . . .

Sa matinud-anon, higala. Tingalig kini na ang katapusan mong panahon. Madungog ba nimo kanang gamay'ng Tingog?

. . . calling,  
I can . . .

Giunsa Niya pagtawag . . . Unsa ang nagatawag kaninyo, kung mao ang inyong Manluluwas? Ang Pulong.

. . . Saviour calling,

Unsay inyong kinahanglang buhaton? Ilimod ang kalibutan.

And take my cross and follow, follow . . .

“Akong nasalikway ang bautismo sa Ngalan ni Jesus, Ginoo.”

I'll go with Him through the garden,  
I'll go . . .

Uban Kaniya, diin? Ngadto sa tubig, ngadto sa tanaman, ngadto sa bisan asa; sa balay nga alampoanan, didto sa linaw, bisan hain. Hukmi kini!

. . . go with Him through the garden,  
I'll go with Him, with Him all the way.  
I'll go with Him through the judgment, (tingali  
kon ang Pulong man husto o ang simbahan  
husto),  
I'll . . .

“Kon ako man husto ba, o Siya ba ang husto. Ang ako bang tanlag husto, o ang Iya bang Pulong maoy husto?” Ikaw ania sa dapit nga hukmanan karon. “Kon unsay ang akong gitoohan, husto ba kini, o husto ba ang Iyang Pulong? Ako ba nagahunahuna nga maayo ra nga hamubo ang akong buhok, magsul-ob sa mga purol? Ako ba nagahunahuna nga maayo ra nga magpasakop sa usa ka denominasyon?” Unsa bay Iyang giingon?

I'll go with Him, with Him all the way.  
Now where He leads me I will follow,

Akong nabayaw ang akong mga kamot, usab, Ginoo. Ginoo, bisan kung hain kini, hain man ang sunod nga Mensahe iwali? Dinhi ba kini sa gihapon, karong gabii, didto sa Africa, sa Germany, Switzerland? Hain man kini, Ginoo?

Where He . . . (bisan asa Mo dad-on, Ginoo) . . .  
me I will follow  
I'll go with Him, with Him all the way.

Karon uban sa nagaduko ninyong mga ulo.

<sup>230</sup> Mokuyog ba kamo Kaniya bisan asa kamo dad-on Niya? Mokuyog ba kamo Kaniya sa diha ang panahon mapupos na, ang mga tawo nagapanglutos, nangatawa, nagabiaybiay? “Ako sa gihapon magauban Kaniya. Ako sa gihapon mokuyog. Ako mopadayon gayud uban Kanimo, Ginoo, bisan diin Ikaw. Ako sa gihapon magapabilin nga maunongon ug matinud-anon. Diha sa kainit sa gubat, ako sa gihapon magapabilin nga maunongon ug matinud-anon. Kung ako mapukan man, Imo akong bangonon pag-usab, Ginoo. ‘Siya nga nagawagtang sa iyang kinabuhi tungud Kanako makakaplag niini.’”

So I'll go with Him, with Him all . . .

<sup>231</sup> Karon kanang tanan nagpasabot niana, gikan sa inyong kasingkasing, ato ibayaw ang atong mga kamot karon, ug ang atong mga kasingkasing, ngadto Kaniya.

Where He leads me I will follow,  
 Where He leads me I will follow,  
 Where He leads me I will follow,  
 I'll go with Him, with Him all the way.  
 He will give me grace and glory,  
 He will give me . . .

Ginoong Jesus, huypa kining mga panyo karon. Ayoha kining mga masakiton ug mga nagbalatian, Ginoo. Itugot kini, Ginoo. Hatagi sila ug kaayohan, Ginoo, sa Ngalan ni Jesus.

And go with me, with me all the way.

<sup>232</sup> Maayo na ba ang inyong gibati karon? [Ang congregasyon nagaingon, "Amen."—Ed.] Nabati na ba ang tanan nga andam na karon? ["Amen."] Kung Siya . . .

The Trumpet of the Lord shall sound, and time  
 shall be no more, (mao kana ang katapusang  
 Trumpeta, karon)  
 And when the morning breaks Eternal, bright  
 and fair.

Atong awiton kini, tanan kita karon. "When the Trumpet of the Lord shall sound." Hatagi kami sa tuno.

When the Trumpet of the Lord shall sound,  
 andtime shall be no more,  
 And the morning breaks Eternal, bright and  
 fair;  
 When the saved of earth shall gather over on  
 the other shore,  
 When the roll is called up yonder, I'll be there.

When the roll is called up yonder,  
 When the roll is called up yonder,  
 When the roll is called up yonder,  
 When the roll is called up yonder, I'll be there.

On that bright and cloudless morning when the  
 dead in Christ shall rise,  
 And the glory of His resurrection share;  
 When then all of life is over, and our work on  
 earth is done,  
 And the roll is called up yonder, I'll be there.

When the roll is called up yonder,  
 When the roll is called up yonder,  
 When the roll is called up yonder,  
 When the roll is called up yonder, I'll be there.

<sup>233</sup> Atong ipataas ang atong mga kamot, magkanayon, "Pinaagi sa Imong gracia, Ginoo." Pinaagi sa Imong gracia, Ginoo! [Ang Congregasyon nagaingon, "Pinaagi sa Imong gracia, Ginoo."—Ed.]

Karon, kita mga igsoong lalaki ug babaye diha kang Cristo. Maglamanohay ta tali sa usa'g usa kaninyo, ug ingna, "Pinaagi sa tabang sa Dios, sa diha ang listahan pagatawgon na didto!"

When the roll is called up yonder,  
When the roll is called up yonder,  
When the roll is called up yonder,  
When the roll is called up yonder, I'll be there.

Unsa bay atong gipaabot?

When that Trumpet (ang katapusang usa) . . .  
the Lord shall sound, and time shall be no . . .  
(Milahus na didto sa Eternidad, "Sa Kalit, sa  
usa ka pagpamilok.") . . . and fair;  
And then when the saved of earth shall gather  
to on the other shore,  
When the roll is called up yonder, I'll be there.  
Ato lamang awiton kini!

When the roll is called up yonder,  
When the roll is called up yonder,  
When the roll is called up yonder,  
When the roll is called up yonder, I'll be there.

<sup>234</sup> Oh, dili ba kana ang maong takna! Nga nagalakaw lamang, usa niana ka adlaw, ug dihay motungha. "Kinsa kini? Mama!" Amen! "Dili na kini madugay karon." Sa pipila na lamang ka mga gutlo, ikaw mausab na. Ug kita mamahimo . . . magatagbo kanila, dayon pagasakgawon uban kanila, sa pagtagbo sa Ginoo diha sa kapanganuran. Oh, sa kalit, sa usa ka pagpamilok. Nagkanayon, "Ania si Igsoong Seward, ang tiguwang igsoon nga lalaki nga kaniadto ania sa iglesia dinhi! Aba, ania si Igsoong DeArk. Ania si Igsoong *si kwan*- . . . Aba, tan-awa diri, silang tanan nagpalibot na kanako! Unsay nahitabo? Dinhi niini sa pipila ka mga gutlo . . . Ako nahibalo nga sila nagpakita na kanako. Dili na kini magdugay karon. Ako mahimong mausab na karon, sa kalit lang, sa kalit lang." Oh, oo! Ug ang Dayong banagbanag, mahayag ug matahum. Ang tanang kahibulongang panganod . . .

<sup>235</sup> Sama sa Iyang giingon, "Israel, ikaw nahisama sa panganod sa kabuntagon, usa ka alisngaw, ug ang imong pagkamatarung nagakahanap." Ug sa diha kining tanan molubad diha sa Silaw sa Anak nga Kinsa maoy nagahupot niining tanan, amen, dayon, "Ang mga ngalan pagatawgon didto, ako maatua didto." Sige.

Hangtud karong gabii:

Till we meet! Till we meet!

Wala kita mahibalo kung unsang taknaa kini mahitabo, mga higala. Kini usa ka sugilanon, sa dugay nang panahon, apan kini mao ang Kamatuoran, ug kini mahitabo. Ania na kita sa takna karon.

Till—till we meet, till we . . .

Pinaagi sa gracia sa Dios, atong lauman, karong ikapito ug tunga ang takna sa gabii.

God be will you till we meet again.

Manindog na kita karon.

<sup>236</sup> Oh, dili ba kini kahibulongan? “Langitnong dapit kini diha kang Cristo Jesus.” Dili ibaylo kini sa bisan unsang butang. Nahibalo kamo kon unsa ko kagusto ang mangisda ug kon unsa ko kagusto ang mangayam, kay akong makita ang Dios didto sa kamingawan. Gusto ko kaayo kini. Apan, oh, akong dili ibaylo ang usa ka gutlo alang niini, alang sa tanang mga kasinatian sa mga gatusan ka mga katuigan. Usa ka gutlo niini, kanang katagbawan!

<sup>237</sup> Dios, buhati sa akong sulod ang usa ka rebaybal. Buhata ako nga usa ka rebaybal. Itugot nga ang matag-usa kanamo mao ang rebaybal, ang rebaybal sa sulod nako. Himoa ako, Ginoo, nga magutom, buhati ako nga mauhaw. Buhati sa akong sulod, Ginoo, kanang unsang akong gikinahanglan. Itugot kanako, sugod niining taknaa, nga Maimo na; labi pang nahalad nga ulipon, usa ka mas maayong ulipon, labi pang nabulahan diha Kanimo; mas takus, mas mapinaubsanon, mas maluloy-on, mas masiboton sa pagpamuhat; mas matinagdanon alang sa mga butang nga may katinoan, ug ginahikalimtan ang mga butang nga nangagi na, ug ang mga walay dapat. Tugoti ako sa pagdasdas ngadto sa dag-anan sa langitnong pagtawag ni Cristo. Amen.

Mao kana ang atong gipangandoy, dili ba? [Ang congregasyon nagaingon, “Amen.”—Ed.]

Sige, atong, hangtud magkita ta karong gabii, atong dalhon ang Ngalan ni Jesus kanato karon, ang matag usa kaninyo karon.

Take—take the Name of Jesus with you,  
Child of sorrow and of woe;  
It will joy and comfort give you,  
Take it everywhere you go.

Precious Name, O how sweet!  
Hope of earth and joy of Heaven;  
Precious Name, O how sweet!  
Hope of earth and joy of Heaven.

Karon atong iduko ang atong mga ulo.

Take the Name of Jesus with you,  
As a shield from every snare;  
When temptations round you gather . . .





*ANG PAG-ILA SA IMONG ADLAW UG ANG MENSAHE NIINI* CEB64-0726M  
(Recognizing Your Day And Its Message)

Kining Mensahe ni Igsoong William Marrion Branham, una giwali sa Ingles dadtong Domingo sa buntag, Hulyo 26, 1964, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2007 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)